



增補甘泉縣志

拾柒函

ル 5
3144
17



凡 5
3144
卷 17

增修甘泉縣志卷二十

甘泉縣知縣吳鄂峙

張宏運

王熙泰

原纂

甘泉縣知縣陳觀國

揚州府教授李保泰續輯

甘泉縣知縣徐成敷

桂正華

朱公純

增訂

藝文志中

辭

明程敏政弔嵇莊辭莽予舟兮北征過淮南之故城問
嵇莊兮何許懷志士兮如生方文山兮竄身脫羈械兮
宵遯望南天兮淚流孰可雪兮終恨嗟若人兮傾家濟
纍臣兮方困雖中興兮無期盡我心而奚論彼柳生兮

何顏乃北面於裔戎賣吾君兮當空揮佞首於一擲竭
草野之孤衷噫宋社之莫復兮固天旤之不悔旣夷夏
之決防兮遂忠讒之失類夫何一士蹇蹇兮獨此心之
不諄眷衣冠之濟濟兮曾編氓之弗逮豈民彝之未泯
兮繫世教之終在盼湖水之東流兮撫桑柘之依依黯
青陽之西遊兮澹條風之吹衣慨去宋之旣遠兮渺人
物之俱非咄前史之靡究兮豈見畧于卑微想叔世之
義俠兮舍斯人其安歸 篁墩集

記

宋韓琦揚州廳壁記揚九州之一地總淮海扼制吳會

前代建府之重東南爲冠故有唐藩鎮之盛唯揚益二
州號天下繁侈其後高駢失政致師鐸之變孫儒楊行
密之徒以盜攻盜互相據奪郭邑殘燼遂爲戰衝本朝
自李重進平必擇文武材臣以領州事民安惠養日以
完復慶歷五年春三月琦得罷樞筦忝被茲任視事之
隙因念前之爲政者尙缺傳載非以謹官守而重朝寄
也於是參考圖籍次以年月刻石於廳事之壁以示永
久後之來者閱其官氏推訪治迹則善惡皆有所倣云
慶歷七年三月日記 安陽集

孔仲武陳成肅公畫像記元豐三年春揚州新學成而

成肅公薨州人以幣如吳使畫者何充圖公之像設于經史閣朔望行禮如先師云公姓陳氏世家建陽少孤徒步數千里卽其母黨甄氏兼晝夜讀書居之數年學大成名聞當世遂登進士科自御史諫官爲侍從歷宰相樞密使公智識精明而厚重沉默朝廷有大議論相顧不決公氣貌安閑不見畔岸徐一言以折之眾則大服曰陳公之言是也天下方倚以修太平會公以疾辭佐遂鎮淮南作所謂新學者自始役至罷公數行視間以宴飲勞諸生學旣成公請於朝頒國子監書以訓學者公之所裨良厚矣則學者事公雖久其可忘乎俾進

退升降於其前者視公之貌而知其平生進退將有以警於己是宜以其閎深博厚爲治心修身之道以其聰明儁爽爲立事應物之方以其忠於君孝於親惠於民爲居家立朝臨官之節則公雖去矣而澤施於人者常在也至於位尊祿厚寵榮天下在公爲宜有而得之不得則天也若曰彼得爲將相而我則未焉我之耻也此不爲知公者於是揚之官屬相與屬余爲文以記之系之以詩曰惟公之德爵隆位極勢則有止不遷惟德古之豪傑爲來者師惟公之容孰不公思思其所爲以立於己公澤之長配此淮水

清江文集

方岳淮東安撫司幹辦公事題名記余教授滁學之明年今端明趙公以書幣聘之佐帥事辭不獲則考前人之嘗爲此者而石燬於兵老吏無傳焉蓋自洪內相咨夔而下僅僅得若干人余旣爲屋三楹於廳事西乃刻而龕之壁而記之曰惟揚古都會帥嘗選用重臣辟士公車豈但取陳琳檄魯仲連書于公異露布以望一府而已軍旅之事吾夫子以爲未之學而今畫諾藩岳者有軍事焉可不謹歟夫氣餒者不足以直是非識汚者不足以明利害欲牽者不足以斷可否器拘者不足以寄安危蓋必如董生相江都王時乃可耳夫然故官卑

而望則尊職輕而責則重列其名氏必有指之者曰某也直某也諛某也曲某也正而又可不謹歟

方秋崖集

明李東陽江都縣學科貢題名記江都於揚爲屬邑舊文獻地也自國朝洪武初建學置師設科舉歲貢之法茅拔而進者時不乏人山陰董君豫來宰是邑政事暇考賢書稽官牒得科貢之士若干人曰此而弗識無以示後學乃彙次其名刻石學宮之庭石旣成則馳書京師請余記夫名有貴賤有賢不肖貴與賤爲虛稱賢與不肖爲定論故君子不以窮達得失爲計而疾不稱畏無聞殆以是耳蓋自公卿大夫以及士農工商皆有名

其始隸於版籍甚微也升於庠陟於國學其始有以別於人人及舉於鄉選於禮部皆錄名於梓以傳進士其最著故錄其家世邑里加詳又題名刻石樹之國學皆令典所不可闕者而其名籍所在若府州縣者又私與題其名於學宮則國學之遺意有司者之事也夫使士之名於此者大足以傳天下而小足以傳之一鄉不亦榮矣乎及其名載宦籍功施而事見司銓覈者歲考秩計執公論者從旁而議之某廉某穢某勤某惰皆判不可揜而凡官職之小夫不與焉歿而傳於史冊或有奸宄貪濁者人得指其名而斥之其或免乎是而庸庸碌

碌泯沒而無聞者又不知其幾也其忠孝貞潔卓然知爲名臣銘鼎彝書竹帛歷萬世而不朽者於是始得爲眞名而所謂崇卑貴賤皆泯焉不復論矣然則爲士者其可以此自恃乎哉江都之士由科貢而升者或居侍從或居風憲以至於州縣學校之官其以政績著者蓋多矣今考諸鼎彝史冊之間亦嘗有其人乎後進之士仰遺風慕餘光志感行勵必有勃然於此者亦今日之名啟之也若羨榮慕貴循虛聲而忘實用則茲名者也適足以爲訾議之資亦惡足恃哉董君以進士出宰有政譽意尤注意學校此其緒餘也

懷麓堂稿

邱濬江都縣學進士題名記自黃帝正名百物以後有一物必有一名然物有時而盡惟名則不恃形以生而長留於天地之間所以然者有聲音文字以寓之蓋聲音文字根於心出於口而具於點畫之間著於簡冊刻於金石者百世猶一日也自唐以來始有題名記盛於宋而極於本朝故事凡登進士第刻其名於石列于太學而天下郡縣士有登科甲者亦列其名於學宮焉江都揚州附郭邑自昔稱揚一益二天下州郡之盛揚州爲最揚州屬邑江都爲最是以人才之生江之北淮之南者以是邑爲稱首雖然士生民中猶人生物中也天

地間物生多矣然一物有一名名同而物無不同者惟人之生同一形體也而人之名則人人殊一人有一名千萬其人則千萬其名以至於億兆皆然自有此邑以來人生其間者何止億兆之億兆而名之存於世也萬不一二焉漢以前不暇論已自唐以後揚州戶口見於史者在唐戶七萬七千一百五口四十六萬而人士之有名列傳者曹憲王紹宗李邕李鄴及鄴之孫綬僅五人焉在宋戶五萬六千八十五口十萬七千而人士之有名列傳者孫洙呂溱輩不過十數人焉而止彼生而具人形書於版籍登於天府者人人有一名也人呼之

而已應之久而至六七十年遽已與草木同漸盡矣而唐宋此數十人者夫何朝代數更而其名姓恆若生哉託之聲音文字之間然也然其所以得託於聲音文字間而有以爲不朽之傳者是豈無其故耶穆叔有言太上立德其次立功其次立言是三物者所以壽其名於不朽之具也江都縣學自洪武乙丑開進士科以來登名黃甲者往往有之然未有爲之題名者今知縣事董君豫以名進士來尹於茲謂爲政以人才爲先治民以法不若以教報國以身不若以人思所以作興其人才俾其知所以奮發出而爲國家之用視事未久卽白於

巡撫都憲張公督學御史婁君太守楊君命工礮石題前進士之名以爲後進士之勸乃走書京師以記來請予故舉穆叔之言俾勒諸貞石以示江都人士雖然德也功也言也實之謂也而能立之則名在焉有其實斯有其名徒有其名而無其實後之人將指其名而責以其實實之無而徒名之有不若無之爲愈也無實之名非惟人不吾堪造物者亦將不吾堪矣可不畏哉可不勉哉

瓊臺集

趙訥江都縣學題名記曰江淮南北之樞也揚州介江淮之間江都附揚州之郭天下有事獨當其衝平居無

事則爲南北水陸往來交會之地舟車迎送日不暇給
頃以江洋倭警新開督府而渤海鹽場舊有院司其供
儲多出之江都故此兵荒之餘民力已竭彼其服舍晏
遊聲色之美乃四方賈旅僑寓者之所有而土著出財
力之人不與也然則官於其地者可不慎哉嘉靖辛酉
冬予自定興移是縣永惟所以憲前傳後者考其官之
姓名已見於郡志而題名無碑其何以觀夫志惟爲士
者能閱之而齊民不與知也惟勒之石則其賢與否人
人得指而是非之矣而縣門又官吏民人出入之地耳
目之所屬其鑒戒爲尤切焉則是題名也其可缺耶乃

以明年春三月取縣令以下自洪武至今若干人題於
石蓋不敢飾爲觀美誠欲藉以示鑒戒云爾嗟乎官之
賢否民之休戚關焉而縣令之親民尤休戚之至要者
然官之所以休戚乎民者止於一時而民之所以是非
乎官者垂於百世君子思百世之是非則其所以加乎
民者自不容於不慎矣

歸田集

序

隋潘徽江都集禮序曰禮之爲用至矣大與天地同節
明與日月齊照源開三本體合四端巢居穴處之前卽
明其理龜文鳥跡以後稍顯其事雖情隨簡易意存玉

帛而夏造殷因可得知也至於秩宗三禮之職司徒五禮之官邦國以和人神惟敬道德仁義非此莫成進退俯仰去茲安適若璽印塗猶防止水豈直譬彼耕耨均斯粉澤而已哉自世屬坑焚時移漢魏叔孫通之碩解高堂隆之博識專門者霧集制作者風馳節文頗修枝條互起皇帝負辰垂旒辨方正位纂勳華之厯象綴文武之憲章車書之所會通觸境斯應雲雨之所沾潤無思不歸東探不匱之符西蠹羽陵之策鳴鑾太室偃伯靈臺樂修五常禮兼八代上柱國太尉揚州總管晉王握珪璋之寶履神明之德隆化讚傑藏用顯仁地居周

邵業冠江楚允文允武多材多藝戎衣而籠關塞朝服而掃江湖收杞梓之材闢康莊之館加以佃漁六學網羅百世繼稷下之絕軌宏泗上之雄風蹟無隱而不探事有難而必綜至於采標綠錯華垂丹篆刑名長短儒墨是非書圃翰林之域理窟談叢之內謁者所求之餘侍醫所校之逸莫不澄涇辨渭拾珠棄蛙以爲質文遞改損益不同明堂曲臺之記南宮東觀之說鄭王徐賀之答崔譙何庾之論簡牒雖盈菁華益鮮乃以宣條暇日聽訟餘晨娛情窺寶之鄉凝相觀濤之岸總括油素躬披細縹芟蕪刈楚振領提綱去其繁雜撮其指要勒

成一家名曰江都集禮凡十二帙一百二十卷取方月數用比星周軍國之義存焉人倫之紀備矣昔者龜蒙令后睢陽名藩誠復出警入蹕擬乘輿之制度建羈載旂用天子之禮樂求諸述作未聞茲典方可韜之潁水副彼名山見刻石之非工嗤懸金之已陋是知沛王通論不獨擅於前修宣朔新書更追慙於往冊徽幸棲仁岳忝遊聖海謬承恩獎敢敘該博之致云

文苑英華

唐駱賓王揚州看競渡序夏日江干駕言臨眺於時桂舟始泛蘭棹初遊鼓吹沸於江山綺羅蔽於雲日便娟舞袖向淥水而全低飄颺歌聲得清風而更遠是以臨

波笑臉艷出浦之輕蓮映渚蛾眉麗穿波之半月服粧舊飾此日爭奇絃管相催茲辰特妙能使洛川迴雪獨美陳思巫嶺行雲專稱宋玉凡諸同好請各賦詩云爾

駱義烏集

賈至送蔣十九丈奏事畢正拜殿中歸淮南幕府序天子以淮海多虞黎人未乂命舊相崔公董之公以封畧所覆澄清是圖辟柱史蔣公佐之如翰負風以石投水於茲五稔方隅定乃朝天闕將命述職帝嘉之進其命秋七月流火言旋幕府懿親良朋寵行惜別曰兵興十年九州殘弊生人凋喪植物耗竭行者罹鋒刃之艱處

增修十縣縣志 卷二十一
者困求奪之累豈不以連率之敗類使臣之無恥獨揚
州一隅人尙完聚屢遇海島震蕩再當河南離叛亟供
職役之繁而室家相保耕績未罷得非崔公之賢乎公
之賢而其佐可知矣今朝廷多故戎狄未服塞門不扃
人心驚駭魚鹽之殷軸轡之富海陵所入也齒革羽毛
玄纁璣組東海所育也匡時之謀富人之術幕府所畫
也豈伊方隅是賴得不勉歟時臨岐贈言蓋各有望眾
君子之志其詩乎 文苑英華

李白餞副大使李藏用移軍廣陵序夫功未足以蓋世
威不可以震主必挾此者持之安歸所以彭越醢於前
韓信誅於後況權位不及於此生危疑而潛禍心上拒
王命是以謀臣將啖以節鉞誘而烹之亦由借鴻濤於
奔鯨膾生人於哮虎呼吸江海橫流百川左縈右拂十
有餘郡國討未及誰當其鋒我副使李公勇冠三軍眾
無一旅橫倚天之劍揮駐日之戈吟嘯四顧熊羆兩集
蒙輪扛鼎之士杖干將而星羅上可以決天雲下可以
絕地維翕振虎旅赫張王師退如山立進若電逝轉戰
百勝僵屍盈川水膏於滄溟陸血於原野一掃瓦解洗
清全吳可謂萬里長城橫斷楚塞不然五嶺之北盡餌
於虵豕勢盤地賊不可圖也而功大用小天高路遐社

稷雖定於劉章封侯未施於李廣使慷慨之士長吁青
雲且移軍廣陵恭揖後命組練照雪樓船乘風簫鼓沸
而三山動旌旆揚而九天轉良牧出祖烈將登筵歌酣
易水之風氣振武安之瓦海日夜色雲帆中流席闌賦
詩以壯三軍之士白也筆已老矣序何能爲

李翰林集

獨孤及送廣陵許戶曹充召募判官赴淮南序冉驩不
庭三年矣王師戒嚴將問罪荒服於是上將分職慎選
乃僚以許公有持斧舊名斷犀餘地故授以戎政俾發
卒於東夫三河之人豪全齊之人武荆吳之人悍藉其
餘勇可以盡敵信以致之繫公是賴然則諭王命敦師

律度程以料民徵騎以濟眾歌事以遣役輯謀以定功
在是行乎高天晚秋殺氣動地靡靡歧路悠悠旃旌送
離如之何賦小戎以爲好

毘陵集

又揚州崔行軍水亭泛舟望月醜集賦詩序言同者無
束約而信心同者未謔浪而樂聲應情至則不俟外獎
況遺言之言造適之笑與杯中物池上月風中絃五者
合以貺余歡其可勝旣乎於是眾君子棲公翰林如翔
鳥之得茂樹也至是登於仙舟泳彼新流掇芳翫奇以
永今日日不足故用夜漏繼之羽觴未及數覆銀河橫
而金波上樂作神王百憂如失而絃繁管清悲歡交乎

增修七泉縣志 卷二十一 三
其間則高歌爭進或道舊以泣酒酣意真樂極感至故也當是時視身後之竹書鼎銘猶稊米芻狗也況細故乎二三子醉猶能賦且酌且詠予屬而和之其詩云明月借秋興流光在此池山公顧我厚醕酌稱未疲勿謂嘉會易但憂離別隨飽君醉中德敢使私心移 同上
又送蔣員外奏事畢還揚州序揚州牧趙國崔公使其部從事侍御史吳興蔣晁如京師條奏官府之廢置歲月之要會其來也吳楚之眾君子酒而詩之而薛水部弁李司直翰雙爲之序以冠篇首既將命趙公拜左僕射蔣侯加尙書郎之位其還也之子日執書卷以言於

朝日始者與數賢別賴斯文故常若在眼今幸而遷秩行車在門明旦離羣想今日之會亦猶於此而思彼也非置書袖中人謂我何然後西人之舊者皆賦韻道別而鄙夫和之詩大畧蓋美蔣侯以才智任職有周爰咨諏之用而將事不墜專對不辱能一其心以佐大府之政政靡小大惟公是謀謀之臧歸於府不知我者則謂我專趙公所以有成璫坐嘯之論而無慚示樂羊謗書之篋而不疑斯可謂之明矣今也于歸翬曳兩綬然濁涇素澹春水始生秦原青青諸草皆秀可共樂也而又別焉凡我同僚是以有瞻望不及之歎故送遠之志悉

增修甘泉縣志

卷二十一

形於文 同上

呂溫地志圖序廣陵李該博達之士也學無不通尤好地理患其書多門歷世浸廣文詞浩蕩學者疲老由是以獨見之明法先聖之制黜諸子之傳記述仲尼之職方會源流考同異務該暢從體要綽然勒成一家之說猶懼其奧未足以昭示後生乃裂素爲方據書而畫隨方面以區別擬形容之訓解命之曰地志圖觀其粉散百川黛凝羣山元氣剖判成乎筆端任土之毛有生之類大鈞變化不出其意然後列以城郭羅於陬落內自五侯九伯外至要荒蠻貊禹跡之所窮漢譯之所通五

色相宜萬邦錯峙毫釐之差而下正乎封畧方寸之界而上當乎分野乾象坤勢炳焉可觀與夫聚米擬其端倪畫地陳乎梗概固不可同年而語其詳畧也每虛室燕居薄帷晴褰普天之下盡在屋壁戶納四海臆籠八極名山大川隨顧奔走殊方絕域率意而到高視華裔坐橫古今觀帝王之疆理見宇宙之寥廓出遐人幽會不崇朝與夫役形神於歲月窮轍跡於區外又不可並舉而論勞逸也且夫刪百代之弊綜羣言之首繁而不亂疏而不陋才識以潤之丹青以炳之使嗜學之徒未披文而見義不由戶而覩奧斯訓導之明也窮地而述

舉世而載事極鴻纖理通皦昧混一家之文軌張大國
之襟帶覈人物之虛實總山川之要會表皇威之有截
明王道之無外斯乃功用之大也見蒼梧塗山則思舜
禹恤民之艱覩窮荒大漠則悟秦漢勞師之弊覽齊墟
晉壤則想桓文勤王之霸觀洞庭荆門則知苗蜀恃險
之敗王者於是明乎得失諸侯於是鑒乎興替斯又懲
勸之遠也然則本之所以廣學流申之足以贊鴻業垂
之可以示後世豈徒由近觀遠以智自樂爲室中之一
物哉而時無知音道不虛行舉地成圖開天無路此志
士儒林所以爲之歎息也某久從君遊辱命序述庶明

作者之意俾好事君子知其所以然

呂和叔集

歐陽詹送族叔行元落第歸廣陵序族叔行元旣射策
於主司不合春二月將歸淮南所寓羣公設獻未酬叔
有悄然不暢之色羣公亦愕爾而阻歡小子侍席奉觴
而前曰歸好事春美時酒樂物叔於三者加同人將之
而有未悅豈禮闈失意之爲乎昆吾產金荆山產玉自
民役巧鎔琢益多惟干將和璞有大聞非百鍊則其工
良可用歟非三獻而其寶可眞歟苟良眞不卽成不卽
售適以精其研稔其實如叔也亦何稽於一邂逅哉若
昔之作必行動必中是則蘇秦無履穿之嘆甯戚無石

爛之歌孫宏無十上之勤商鞅無再干之勞也知秦而不知否知易而不知難是夫人也非所以待叔也叔如之何叔忻然見卞氏又來之路平歸心納春景安酒意四坐以叶千鐘有娛既醉升車秋爲到期清源文獻徐鉉廣陵劉生賦集序楚人孟賓于常謂予言其叔父工爲詞賦應舉入洛贄文於學士李公琪公爲之改定數處時中書舍人姚公洎知舉謂人曰孟生賦李五爲改了不煩更書看也遂擢上第孟還鄉從事郡府丞歷免危難唯以李公所改文綴於衣中曰吾家但存此足矣賓于每自喜其家門美事歎後來之無人今廣陵劉

生奮衣衡門振藻文苑詞贍而理勝行潔而言芳求己若不足好問如不及余之名不逮於李公何能振發於子乎聊薦所聞以答子勤學之志冠篇於首以伸我與進之心噫子家貧親老必將圖登龍之舉不暇從冥鴻之遊文明之世羣才畢舉慎重足以全孝進退足以知命此前達之務也子其勉之騎省集

宋秦觀揚州集序揚州集者大夫鮮于公領州事之二年命教授馬君希孟採諸家之集而次之又搜訪於境內簡編碑板亡缺之餘凡得古律詩選箴賦合二百二篇勒爲三卷號揚州集云按禹貢曰淮海惟揚州彭蠡

既瀕三江既入震澤底定而周禮職方氏亦稱東南曰揚州其山鎮曰會稽其澤藪曰具區江曰三江浸曰五湖則三代以前所謂揚州者西北極淮東南距海江湖之間盡其地自漢以來既置刺史於是稱揚州者往往指其刺史所治而已蓋西漢刺史無常治東漢治歷陽或徙壽春又徙曲阿魏亦治壽春或徙合肥吳治建業西晉後魏後周皆因魏東晉宋齊梁陳皆因吳惟宋常以建業爲王畿而東揚州爲揚州東揚州者會稽也隋以後皆治廣陵由是言之凡稱揚州者東漢指歷陽或壽春或曲阿或合肥自魏至周指壽春或合肥江左自

吳至陳指建業或會稽隋唐五代乃指廣陵在二漢時嘗爲吳國江都國廣陵郡宋爲南兖州北齊爲東廣州後周爲吳州唐初亦爲邗州其爲揚州自隋始也由是言之凡稱吳國江都廣陵南兖東廣吳州邗州皆今之揚州也此集之作自魏文帝詩已下在當時雖非揚州而實今之廣陵者皆取之其非廣陵而當時爲揚州者皆不復取至楊子雲箴本約禹貢爲辭則廣陵自在其中不得不錄也既成公又屬觀推表廢興遷徙之跡而究其端使夫覽之者有考焉

淮海集

陳造揚州進士題名記序科舉取士肇於漢詳於唐我

增修甘泉縣志 卷二十一
朝莫盛焉公卿大夫不由是而進歎如也世之於吏苟
曰是本進士則逆以廉隅辦濟必之而東南之地連山
大川拱揖後先建楚蜀而下東爲揚州其勢之磅礴氣
之扶輿若盜驪駮耳驚驅長驚而忽踈足驤首徘徊顧
慕而不去則其鬱蓄鍾孕非奇傑哲艾無以當之開國
至今揚之士宏材邃學政術文章所謂奇傑哲艾不知
其幾而科第所得爲多至呂公溱王公昂李公易皆魁
天下士盛矣哉南渡而來士氣文風中圯而漸振雖消
長污隆有不可得而齊然其江山形勢磅礴而扶輿自
若也而名世之儒復自魏科與大政儲宅揆之望則士

畏古卑今自重之弗果其可哉某無似忝師帥之任撫
俗育材其職也庀事二年里閭似無愁歎而於學政尤
未始敢忽茲荷上恩俾因任以究己試或者學校科舉
之間猶及拭目平日之盛歟故取國初以來揚之士題
慈恩之名者凡若干刻諸樂石置於學宮示予所以期
諸生之意詩不云乎高山仰止景行行止觀者其庸忽
諸 江湖長翁文集

樓鑰檠菴居士文集序江都李氏名族也紹興間明之
從民者多俊茂余生晚猶及識將作監端明平叔及其
子永皆有詩聲又有名璜字德劭者平原公之從孫將

作之再從弟少負雋才而頗誕放耻從進士舉里人或
譙之則曰我非不欲試但恐奪爾曹魁爾又嗤笑之乃
曰爾曹不信我將試矣一試果魁維揚後寓四明筆力
雄邁人所罕及時初脫兵火之厄郡縣庠校記文多出
其手太守仇公泰然悉周公元舉綱潘公子賤良貴皆
一時名公莫不低簪禮之侍御史王公伯禮伯庠爲教
官與之游最厚蓋文字之友也四明多禪刹往來其間
或以書來云孟信安欲招爲壻資送特豐且可得官擲
於地曰老大乃復爲此耶竟不報旣不得志場屋蕭散
翫麟以終其身不娶無子晚從宏智禪師於言下有省

益航內典以其筆耕之餘買田一頃施於阿育王山使
奉嘗我寫照而題其上至今留水陸堂中遇薦羞則爲
設嘗讀其贊有云分明便是龐居士又却無人賣罩籬
不可謂無所得然亦可哀也已嘗見侍御言德劭病革
往候之問向爲文用僧騰客爲何事曰侯景臺城事也
又問平日了達今何所見曰都無所見但覺人氣消散
爾出書一囊乃其遺稿猶顧而言曰以屬吾子勿竊吾
詩文以爲已作平時相忘方緜懶時戲調尙如此里人
戴伯與權雅士也託館王氏慕其文名從侍御諸子借
囊出稿而手編之又多殘紙斷壞不可盡錄故所存十

之二三僅得詩文雜著幾二百篇釐爲十二卷俾余爲序久未暇及嘗取其白氏長慶詩譜錄寄吳門使君李諫議既爲刊於集後又索其詩文且曰近爲建甯當梓以行余喜其文之將就泯沒而克傳也爲序其大概而記之嗚呼世之騷人才士耽嗜成癖哦詩屬文皆欲有聞於世而因仍埋沒與草木同腐不得以一路自見由古以來不知其幾德劭之集藏於侍御之家傳於伯與又因余諫議而行於世茲非幸與若其詩句之工妙文體之高勝出入古今追配前良不待余言覽者當自知之槩菴其自號云

文苑文苑

李東陽送周揚州序成化庚寅京師饑天子簡廷臣出領賑事命之曰用命且有賞不用命有罰監察御史周君本清亦中簡在分理順天數縣辛卯事畢告於朝首擢爲揚州知府夫守令之職非直衣食乎民也而食與衣莫先焉凡百之事胥此焉出今有五尺之童號於道其倉皇爲之求食與衣者必其父母也平立睨視談笑而過之者必途之人也不惟弗揀而且褫奪之撼頓之者必其仇讐也今之守令者將爲父母焉將爲途人焉將爲仇讐焉仇讐固不足論苟徒愛之而弗揀是亦途人而已矣爲父母者必爲之計深遠先事而圖之因時

而爲之節田有常畝桑有常等除其兼并均其徭役以
使有餘不幸有小害不失其利又不幸而大害猶能免
死亡夫是之謂民之父母不能先事而圖因循怠惰以
至爲病爲亡爲盜然後從而掾之其力必且十倍而況
未能掾之乎夫比歲之災去歲爲甚去歲之災畿甸之
郡縣爲甚畿甸之郡縣爲病爲亡爲盜者相望也其所
由來者久矣卒以朝廷數百萬之費一二臣簡任之專
遲之以數月之久僅足以弭其患之大可不謂甚難乎
思其難以圖其易古之道也以今歲校往歲不可謂不
豐以南方校北方非不富且庶也而揚州又素稱繁庶

之地比年以來亦損其半矣識者蓋深憂之天下之事
惟憂於未弊者乃可以無弊由是言之雖天下可憂也
而况揚州乎此惟深謀實慮之士可與言之而世俗者
之所謂迂也周君在吾鄉爲賢士在臺憲爲賢御史在
畿甸爲賢使臣茲州之治朝廷實畀之而吾輩實深望
之也周君勉乎哉

懷麓堂稿

羅欽順送大尹蕭君之任江都序國朝建官圖治於縣
令之選最嚴非發身科貢兩途雖下縣不以輕畀凡自
他途進者間有循資序稍入優品而卒不得爲令豈不
以令者百里之民命所寄必得學古通經之士然後知

增修甘泉縣志 卷二十一
所以教養之方所謂君子學道則愛人也而縣令之中
選自進士科者特蒙異視其褒揚魁然傑然者於羣眾
之中固將以大任付焉非徒責其小成爾已也夫以朝
廷所以嚴縣令之選如此所以優進士之爲令者又如
此爲令者宜何如其圖維報稱也時俗所務在於謹送
迎精簿書赴期會而於民之痛痒靡切於身俗之迷溺
無改其舊烏乎可無乃非朝廷所以嚴重優厚之意乎
吾友蕭君以仁從祖太子少師尙約先生家學講明踐
履之日久其爲人純實豈弟有愛人之心由己未進士
選爲揚之江都令吾以江都之民庶幾蒙君子之澤矣

顧惟其地四通八達賓客之往來者踵常相錯於途簿
書期會之瑣瑣未論也如以仁之存心將不屑乎時俗
所務然而一送一迎之失固足以速謗而招尤欲安其
位以行其志得乎夫天下固有事同而趣異者顧所用
心何如耳吾欲安於其位得行其志以澤吾民而非以
要譽也則夫送往迎來亦禮之所不廢者而奚以不屑
爲哉大凡人之才性必有所長苟非聖人豈無不足要
在勉強而已故曰勇猛剛强者戒於大暴仁愛溫良者
戒於無斷湛靜安舒者戒於後時廣心浩大者戒於遺
忘賢如以仁亦有當戒者乎誠不恃其所長務兼眾美

以爲用其不至於大任者未之有也以仁之官鄉邑故事當有文字爲贈謂余職載筆不容以他讓余豈能文者哉姑以達諸君之意而已

整菴存稿

張昇送江都令何君源清赴任序江都乃揚之屬邑當南北之衝據江淮之會帆檣鱗次車馬輻輳閭閻櫛比銜使命而往來者日不可勝數吏斯土者晝不能安居夜不能奠枕而供億之浩徵應之煩獄訟之雜追胥之殷防禦之急倍蓰他邑蓋揚州天下重地也江都又揚州劇邑也一勤惰間而禍福隨之爲令者幾何而能堪其任哉今歲春會天下朝覲之期皇上憫念民艱之鮮

適乃大明黜陟繼而命銓部遴選賢才以補守令吾友何君源清新授江都令鄉里士君子則曰源清慎默人也顧冗以斯邑母乃僕僕煩勞而避咎之不暇抑何暇從容閉簾而惠及其民哉余曰不然君子之學以適用爲貴焉往而弗宜借曰必得善邑而後能爲則君子之學爲有限量矣何足貴之有昔人謂不遇盤根錯節無以別利器不得劇邑則有用之才與庸人等耳書曰學古入官議事以制政乃不迷是則入官之道不學惡乎能制其事不制事惡乎能保其政不迷耶源清金谿人而族甚鉅其居密邇吾盱不能二十里余知之頗悉家

食時卽有名屢舉鄉試而不偶縣大夫輒期待之殊厚若今提學御史張西銘作縣時題四大字遺之曰桂林一枝殆以其學優而足冠倫輩也逮宏治乙卯以胄監生而中順天鄉試鄉里猶遲之亦服其學問老成也且爲人天質謹重言動不浮蘊老成之學抱適用之器其於江都也何有雖劇邑而應之緩急政之先後事之輕重也審計之有素舉而措之易易耳安有失其序而爽其宜哉故不以斯邑爲源清窘而深以爲源清賀必將顯其才猷也

張文僖公集

儲罐送吳中立知揚州序國朝置天下爲十有三司司

各控其府南北之府獨直隸兩京大形勢也其選守也常重其守也常難其守之賢或不賢也毀譽常易被揚州府隸南京負淮瞰江東際於海吳楚之交截然一都會也其選守也尤重府率三州七縣民事旣紛不可理加之郵傳將迎之勤供億誅求之苦魚鹽商旅之雜皆萃於府聽於守焉其守也尤難地直要衝多四方遊談博辯之士啣朝命使四方者又日夜交馳旁出不絕其賢否毀譽尤易被自非材識精敏知大體有行望者罔克勝此肇國迄今守揚者奚翅數千人前之賢者曠未及知也求之近世志行卓異愚民思不怠則今三原王

公爲稱首公後歷臺省握戎政勲名顯大照映當時究其注心勵行已昉於爲守時矣繼之者鮮或及焉嗟夫是豈其士風民俗驟殊於前日也哉特所以爲守者有不同焉爾上在位久今年春當黜陟之期勅銓曹察外有司賢不賢者進退之整齊吏治興起太平於時揚州關守吳君中立被大臣薦往踐其任中立世家臨川自進士歷官南京刑部郎中十年矣其爲人也志剛而氣和識敏而行潔都人士皆謂是官非中立不可異時追紹王公者其切望於斯人矣乎讎旣喜揚人得君矣且竊爲君喜焉昔人爲事功之成由時勢之易揚州古稱

樂土近年始失舊觀民望賢守殆饑渴然中立蓄其所
有甚富際此凋敝之餘同僚留者又多君子相與協恭
沛發嘉政一蘇疲民吾見其守無難而聲問易流也唯
不自揆嘗欲傳王公政績爲二千石楷法未就也俟他
日吳君政之成也並傳其事以告揚人於不忘焉揚之
官南都者刑部郎中孫蕃都察院知事戴璋吏部司務
黃用戶部郎中冒政相率爲酒肴餞之旣屬讎爲敘

文集

王慎中陸龍津詩集序維揚陸君龍津少以異質有文
名每出語輒驚其先生長老治舉子業熒然著於一時

增修甘泉縣志 卷二十一
有司試士君卽收其最等人謂陸君俯拾塲屋俊選如地芥耳君顧不樂爲舉子業曰是拘曲徼繞者不足爲獨好爲詩陸氏世有詩人以其學傳於家君與諸父昆弟相唱和長篇短什易詞險語更往迭來江左諸謝羣阮不足多也君詩日益工文轉日益不著有司至試者鮮復錄君同輩見其如此亦易視之君獨自得視眾人以舉業浮詞獵取聲利者泊然如無也不少摧其意其好詩益酷晚乃從一官捧檄書行數千里爲人之佐頽然處郡幕中上官大吏皆所謂以舉子業得名據尊踐嚴君方趨走伏謁跪拜逡巡手板顛倒色沮氣屏得毋

悔前之所爲乎昔唐以詩賦取士士旣以詩賦收其科發身乃有增治經術者方今號爲黜詩賦尊經術士亦必以經術收其科發身然後習爲詩賦其輕重不同亦使制之然也然必收其科發身後習爲詩賦者乃可以釣譽射聲爲世所述其不能收其科者雖善爲詩賦世亦莫賞也君之爲幕職不以卑冗遂自貶薄修飭振迅趨功急事鈍而不躁上官大吏所以接遇任使之者異於他職彼所以待之異者誠以君爲能官而已豈知其善爲詩益甚雖在卑苦煩冗簿牒之頃行役之次濡毫伸紙脰引朐決鳴聲嗚嗚從吏走卒爲之驚顧不曉爲

增補東坡志林卷二十一
何篇斷句落輒復自喜一日持其稿抵余曰先生其爲
我評之觀君之意豈非有感於世之莫知而獨有望於
余乎余早歲溺於文詞氣盛志強勇於自信往往爲倫
輩言詩妄肆雌黃旁視他人皆若無有今方自創氣銷
志弛見人所作輒茫然却顧知不能及況如君詩之善
者哉身廢名辱雖能知君之詩胡能爲輕重君顧獨深
望余也余既嘉其好又愧其意也讀其詩卒編遂序而
歸之

遵巖文集

嚴嵩贈易揚州序四海九州之遠閭閻幽隱疾痛之情
勢有所不得達於天子之庭天子以拊循安集寄之於
刺史縣令刺史縣令於民近而易知也其情幽隱疾痛
得於目易見也以易見之近告易知之事由是下之情
得不鬱而上聞君之澤得不壅而下究雖有水旱凶荒
之變而民不病故曰天子所與其治天下者刺史縣令
而已今州縣之災甚矣淮之南北連數州之境亢旱淫
潦夏秋相仍暴殄蕩廬杼柚蕭然流離傭丐殍死者屬
於道藉使令沓弗治守貽弗恤如吾民何易君之守揚
州也始至則親以身當風炎日燠之毒以行禱郡祀泮
甸當饋而歎方寢而不寐又已責弛禁抑價平糶列狀
書奏天子於是有寬蘇之詔有賑濟之使夫蓄珍堯湯

增補身類 卷二十一
之世所不能無也惟得人焉以求拯補之術則民恃無
患雖饑且瘠而不至盡委溝壑而今世吏其漠然者固
無足責幸知其急而欲拯之者其力與才又不足以集
事如易君者既不忽於民而力又有餘則爲之民者庶
幾其有賴乎初君將之官尙寶卿鄭公屬嵩爲贈言諾
焉而未有復也及是揚之士以君治狀來告則以是爲
贈庶幾以慰君之志而相其勤焉爾

鈴山堂集

呂本送大郡伯馮存齋入覲序明年甲辰春天下當朝
會之期乃維揚則郡守馮公存齋往也自存齋治維揚
能其官數月間有殊聞顯績其僚友鯉湖王君輩咸推

讓之謂宜有紀頌以傳示永久乃以本昔從史氏之後
因屬筆焉本乃言曰內而不可外者局於器也言而不
可行者循於名也行而不可久者作於僞也存齋起家
進士妙簡形宸峻陟青瑣居法從論思之職持朝廷廢
置之公直亮謇諤雖劉向之名儒袁高之良臣無以過
也卽久任之固宜否亦當得內擢而不免於維揚之行
使他人將忿忿不釋於懷矣存齋欣然縮綬而來曰雙
旌五馬分虎佩魚不云官至刺史亦榮哉可以觀存齋
之器矣存齋在瑣闥也每上封事必舉羣吏之廉貪民
情之淑慝時事之利病指畫陳說動中肯綮天下莫不

增修甘泉縣志 卷二十一
知存齋之有言矣今自治維揚以來蚤夜孳孳奉職循
理興利革弊推惠布德廉以律已嚴以馭吏振舉學校
祛斥僧尼盡省無益之費僅存惟正之供水旱有備盜
賊無警眾瘼遂蠲羣情鄉化頌聲起於閭閻政聲騰於
畿甸可謂躬行君子矣斯其實用彰彰古稱良二千石
者哉夫違眾用己市高微奇衒其難測之智可喜可愕
此任私行險非經常之道不可通理也民將安賴哉今
維揚千里之內士專其業農樂於耕工賈安肆誠意既
孚鉤距靡用使民見存齋之心如水之寒火之熱金石
之堅剛當無可易者謂可久之業非邪由是觀之不特

在外爲然使復大而內也則黼黻皇猷經綸大業又可
知矣不特維揚爲然易地而擢也則流譽海內澤潤生
民又可知矣不特數月爲然使百年不變秉節不渝又
可知矣聞之古郡守有賜衣以遣者焉有賜詩以遣者
焉有下詔以稱揚者焉有書名於屏風者焉無非見聖
天子共治之懷申不次表用之典耳存齋茲行也首受
上賞游膺殊擢又何疑哉維揚之民雖有願借之情恐
不可得矣

明齋集

崔桐嘉靖維揚志序維揚故有志矣時淹跡改非完書
也鄉大夫趙具區嘗修之矣而年不及究亦未爲定論

馬郡守雙橋朱君謂志事爲揚闕典亟具白於侍御象
岡胡使君蓋圖以儒術飾吏治也使君曰嗟乎揚實古
名郡志而弗究可但已乎迺以成績屬郡守郡守延儒
萃能公聽周庀夙夜事事無何志成馳帙致桐且徵言
以序志桐展開再三撫卷而歎曰夫志豈其徒爲也哉
窮俯仰以備三才綜古今以陳故實公是非以定予奪
志之義也志而徒爲謂之曰詭弗志可也夫志豈其易
爲也哉必直史以宰其異同必達才以悉其記睹必契
載以極其探討志而易爲謂之曰陋將焉用之夫志史
之流也自昔先王之經世議制也天下有圖方氏掌焉

邦國有志小史掌焉四方有志外史掌焉凡以總於朝
廷關乎政教非曰資觀美爲也代沿叔季志義微矣而
一二守令或用情焉方者間以爲病此其述作者難乎
其已任也桐讀嘉靖維揚志迺知今斯之舉殆免於徒
爲易爲矣乎於是志也會精盡變理氣昭焉存往綴新
隆替具焉躋正紕誣聲規植焉一邦信史也是志也蜀
岡盛大卿郡之良也實宗主之掄選之庶司文學之羣
彥實羽翼之溯諸二十一史踵諸寶祐遺志參諸先儒
緒論摭諸鄉達私錄閱致而慎取之孔子謂杞宋不足
徵文獻不足故也今迺知斯舉之信爲足徵也是志也

大而太史得之可以備懿典小而學士得之可以資博
考明而有司得之可以興感慨修職守爲人臣爲人子
爲人婦者得之可以思盡忠思盡孝思盡節懦者可立
頑者可廉今乃知斯舉之大有裨於政教也志三十六
卷凡例一卷胡使君諱植豫章人朱郡守諱懷幹歸安
人盛大卿諱儀江都人羣執事諱氏具登卷端不復錄
東洲集

李攀龍廣陵十先生傳序人才之生雖地氣使然哉曷
嘗不由應運而興者乎應運而興則地氣與運人才相
感以勸其成相感以勸其成然後闕之不爲沮挫之不
爲變也我世宗肅皇帝以聖文神武治天下者且五十
年乃廣陵有先生十人洪永之際於斯爲盛矣儲公之
黜如臯令與王公之訊蕭敬景伯時趙叔鳴之忤逆瑾
也朱升之之掾顧開封與蔣子雲之諫南狩也會公之
啣啣于遼左與桑子木之傾於骸骨之疏宗子相之祭
楊太僕也所不罹者朱子价一人而已奈何十人而九
闕之九挫之乎肅皇帝懲宦者煽亂而制奸臣之命斯
運之所由起也余往見歐君矯矯負史才而致意乎作
者有鑒裁矣善乎傳所謂廣陵在漢時吳王好文辭而
大山小山之作奮自淮南彬彬哉明興二百年廣陵多

文學之士乃今始有宗臣今勿論其所得卽自諸公已
力圖復古推轂獻吉景明輩而伯時子雲叔鳴升之亦
各以聲藝翱翔李何間矣子相後出相勸而成者乎翩
翩孔璋之流也世方病文學之士無吏事登陴而守福
州者誰與永安之捷與海防二三策豈一語不相合也
而況馬政軍餉綏夷導河如儲王以下諸公所至有績
者乎故闕之不爲沮挫之不爲變進則謀國家退則著
文辭自董生而授經術之業有如十先生廣陵得以稱
文獻之邦矣何應運而興而河套之議卒撓於讒而不
得以復國家二百年之疆圉設令子木之奏行而嚴氏

者與三尚書並罷豈有侔主之禍也豈廣陵地氣微不
能與運會而適至是乎傳言儲受知尹恭簡朱納交邊
庭實二公皆余里人叔鳴按察副使曾公都御史又皆
在山東子价余同年進士而子相則傳所謂昔者吾友
也十人而得其六是傳也以徵文獻則足矣其斯實錄
云

滄溟集

張槃維揚人物志序維揚人物志先正雪洲黃公所述
也公旣歿十年槃始得發遺編而讀之見其勞焉靡淪
渙焉靡萃遺焉靡廣也日嗟乎其未成之書乎懼其遂
終逸也乃退而彙次之凡爲卷八爲類十有五爲人百

增修甘泉縣志 卷二十一
二十有一而以外傳終焉於是乎十國之英千五百年之產雖醜駁匪齊亦炳焉可觀矣是故儒以盡人學以盡事首之儒學以盡道也卿相以酌化元臺諫以裨君道治斯成矣故次之以宰輔次之以風節以及物者存乎制以明教者存乎倫必由學致之故次之以政事以孝義孝義立矣以是移忠以是犯難曷往弗臧故次之以忠節大綱正焉可以爲文矣故次之以文苑文以飾治武以勦亂才匪偏也故次之以將略或仕或止其歸一也故次之以隱逸庸之斯行匪終藏也若乃精業以利用善辭以存國談譎以寄諷豪邁以立功要非嫌於

小成故藝術詠諧遊俠亦以類次焉其流寓者或以重邦或以畱化來遊來歌厥繫匪輕惡得而遺之男以治外女以治內壺範之良婦道之光也故以列女終焉是陽教陰教意也夫邦有僭僞民靡有寧胡爲乎其附之亦晉錄載記唐傳叛臣類也斯志也或亦公之遺志乎

舊志

梅守箕揚州府志序今夫揚州之爲域也關天下要害南北胸臆四通八達之莊貢賦轉輸之道江海交會之地鹽法漕渠之重東陪京而西祖陵承制繡錯之處近歲國家多事倭酋稱亂則海波慮沸姦盜匿萌則江雩

恐熾瀕湖隱葦實多訛言而攻金採木之使絡繹於浦
次治河築堰之役歲月於波衝疲曳力征亦云竭澤而
重以苛稅閏雌菱蘆屯馬中官之制駐於揚者多至三
四曹財賈作囚為宵人所欣豔俗之恍輕商農之怨咨
獄訟之放紛駟僮之伏跳揚之為揚幾不國矣於是濟
甯楊公為時所特簡來典是邦也一切與民和靜正以
勝之施舍已責振廢滯飭官邪屏吏憚汰奇艱禁淫慝
約繁徵追戾斂調其不調停其不停民狎於馴士閑於
伍戒事夙除日中市衍昔人之論用兵也曰好以暇能
以眾整暇而能整故以其餘力而之於文翰斯志記之

事修焉夫志者一國之史也文獻不足徵仲尼志感於
宋杞春秋紹明王迹左氏號為素臣陳壽以不立史官
少諸葛武侯然蜀未嘗無史也武侯當紛爭匡攘之秋
猶不可無史而況世際明盛豐殖重地乎方今文德胥
洽惡氛潛霽而命令事任或非其故者以一郡知天下
則舊章之尤當亟亟也不然朝更夕張焉知其道所繇
前定為律後是為令又烏知其所從來故志之不可以
已也惟此時為然揚州志不修者六十年而典實變更
日新月異楊公文德既富吏道釐醕德禮之代政刑篇
緹之易衡石青衿泰而赭衣虛魴魚前而陽鱗後猶自

撫謙廣益爰集眾思進司李徐公而授之管討論修飾
事咸屬之刪潤之權則已任焉其詞簡嚴其事該瞻體
裁叶而要領得故略而詳以是知凡費言說而反晦者
其筆之不足也此可以証矣 居諸二集

汪道昆廣陵懷古詩序六代更都金陵則廣陵重矣及
隋南幸極汰窮奢即一旦土崩猶豔千古二祖兩都並
建漕江南以奉大農自江入淮此其喉舌鹽筴當歲入
之什二上賈所都彼挾其贏殆將與隋鬪靡即遇孔融
何遜揚揚自如余嘗目攝之褊心未化往往望城不入
寧輕河汾以干隋孟奇三與計偕於斯一息獨行偶偶

懷古稱詩大業荒亡陳迹猶可僂指姑蘇麋鹿殷鑒在
焉他若通溝煮海築壘陟岡借曰霸圖猶燭火耳其所
西面獨廣川一人上下數千百年直將旦暮遇之矣其
詩諸體俱備袞鉞並陳孟奇故受春秋於姜秩宗由董
新都而首舉昔中壘登廣川於伊呂新都推轂亦如之
以彼其才非直博學宏辭足多也茲出金陵謁王元美
復過不佞於新都篋中出新詩則十有七章成帙矣余
方偃蹇東閣屬和未遑牛斗之墟則大司寇在因頰首
簡屬孟奇質之 太函集
呂坤贈孫宏海同守維揚序宏海公以萬曆庚辰登進

增補東野志 卷二十一
士高第初試霸州守霸近都城時余在都城知霸州政
勁節直道不佞監司繼調吉州吉貧余按察三晉日知
吉州政催科撫字人謂陽城繼補華州華嚴郡也余保
釐三秦日知華州政邨豪右而惠小民公家在濱州濱
隸濟南昔余分宣濟南濱人甚譽公曰君子靜而厚不
侮奪人繼爲我歸德別駕時余告里中里中父老爲余
言自我生髮未燥至今頭盡白幾得孫公且署睢署太
康署虞城署柘所在得人心其頌德恩如我里人云余
閱人多矣又閱且詳豈其齷齪作傷憐人瓌瓌作猥屑
人碌碌作容與人不足識耶抑或矯飾不可闕聽黯默

不可方物人難識耶乃吉州之調也霸人爲公屈華州
之遷南曹也華人爲公屈已而左遷吾郡也三郡人又
愈爲公屈在吾郡幾四年矣不卽守揚州又復貳之九
屬人莫不爲公怏怏如三郡嗟乎何所至士民德公如
此之深而當事者知公之淺耶尹興安曰公之不見知
無意於求知也以公之才之德令稍自削觚順風之呼
耳柱下史云知我者希則我貴沈光祿曰我觀躍者矣
蹲甚則踊高往者名公卿鈍於前而駛於後則屈伸之
大較也廟堂拔淹滯矣當不次公庚桑子云退我尋進
我常觀察曰公有道人也來吾郡日無失意容去吾郡

日無失意容郭無始云物榮亦榮未嘗不寧宗伯沈先生曰薑桂之辛不以地移公之治揚也當如四郡異日揚人之德公也當如四郡此之聲施奚論三公用伯況云吾不以千載易一時余聞而喜曰四公之閱公也詳於我矣夫獨知之契不靳於天下後世莫不聞矧秦燕宋晉之民之閱公也又詳於四公當事者必有聞也而維揚不得久借公矣

去偽齋集

王納諫賀郭郡伯考績序河中郭公之爲吾揚州也諸爲郡未有大得人心之和如公者也至而喜徐而益暢久而益洽吾士庶民樂有公公亦樂有吾士庶民栩栩焉從春風翔而與灝氣遊也先是公以比部郎奉寬恤詔來淮南淮南人習公大度長者聞公爲郡動色相告然猶憶公曩爲客今爲主人客入人家見駮劣僕婢亦憐而撫之一作主人不免持法相督此亦人情而公蒞郡德澤有加焉公魁然長者未嘗以姁姁借人載其寬大自并容無外人心是以公至而喜也揚瘠土也而當四方走集之會馳輶繫舸者饒吹日聞民隴俗易牒愬山委而公才犀利當者立斷其值事有疑滯老胥相視蹙額不置公一筦爾逐有區分結者以析悍者以奪客使道者無論餼牽豐殺如儀凡有爰諮曲得所懷諸獄

增補甘泉縣志 卷二十一
訟者往往不至郡庭其意不休比至郡庭又不覺頓休
公非必煩慮極辨其精爽洞豁望而快之人心是以徐
益暢也人所知公博大爽噎大抵如此矣而不知公抑
又苦心於此矣時事稍異處其間者或婉直兩窮公爲
坦然不立德怨不顧誹譽一衷之情理之合有如闔人
某馳僞傳事覺公所論鞠法與事麗鼠磔器完竟得報
可又詔獄有所逮治多大族公矢天日劑競練爲不可
奪直指使者恃公而治諸屬十城長吏受才不同量如
藥溫涼用之適可實惟公爲之導師蓋政之成也上下
悅安形神相親故又曰久而益洽也噫嘻政之成矣人

之洽矣而公心則用是獨苦矣嘗微伺公顧不見有焦
勞不怡之色起居燕遊雍雍若無事豈公瑰才難者易
之歟抑此諸事他人謂之難爲在公量有餘匪難易之
論耶抑公赤誠不憚其難故無所不易歟然則今天下
事又何足以難公者歟公之大用未易究測而吾淺識
亦復何以測吾公也自惟不佞賦性鄙鈍每胸懷結轡
如含瓦礫間與公接則豁然心開者久之不知公之發
吾覆耶與他人處一年而習二年而狎三年而厭惟公
數見日新吾以是知公未易測也設或刺吾言以爲阿
其同年郡公不無諛辭則吾有說於此試立人於園橋

觀聽之間而曰誥爾多士凡心與郡公者左袒疑者右袒吾見士翕然左袒矣公所造士躬礪手校斐然改觀解額得雋者於斯爲盛然公博大尊重非曲徇士多士莫不心歸之豈不以至誠所感公論所出哉茲公三載考績江都邑師儒微鄙言以頌公而吾所言者固闔郡人之言也吾何能言

初日齋集

呂陽送雲間沈宗林之任揚州學正序世有經綸於學舍丹雘於詞林如李膺黃憲其人者乎曰維沈公又有握隋侯之珠懷荆山之璧而一坐寒氈十年不變色者乎曰亦維沈公公由來安訓陟吾錫之司諭人皆喜之

而師不知喜也易林之屯曰蒼龍單獨與石相觸室家不淑故其道北而南也及其三任爲邗州學正人或迂之也易林之觀曰江淮河海天之奧府樂我君子可以長有故其教南而北也昔人以文學爲掌故博士爲散員棄之弗爲攷諸秦漢刺史之尊居無常治吏不成臣奉六條而已故刺史稱傳車其吏言從事唐宋三師三公不常設臺省寺監之官但領空名無實位雖至尊如中書門下同三品職亦一博士掌故而已故曰官無崇卑稱職則良任無大小循久則臧學之染人甚於丹青丹青吾見其久而渝矣未見久學而渝者也則公一坐

增補世身錄卷二十一
寒壇十年不變宜也況於公之爲學通五經貫六藝七
戰蘭皋而俛得之者二焉今且以其二之一治諸生端
矩獲肅衣冠其服尋收端縞紳鞞也其佩瑀琚珩璜也
其爲容爲聲則堂上堂下之籩豆戚揚也匡衡平原文
翁之於蜀鄭克之於鄧州陸九齡之於興國皆地醜德
齊莫之能尙於是挾圖書負墳策零會於京師如明帝
之臨雍拜老其庶焉不然崇陽四書院居中處之亦可
久也邗州之塾特四姓小侯等耳何足公榮雖然邗州
故東部產也陳琳武庫之才且猶避之三舍小巫見大
巫神氣盡矣非東部不可以朝居而槃旋乎柁榴之廣

夏馳騁乎芍藥之崇階未易得也夫六物具而得魚六
藝成而得教沈公行矣且夫坐木蘭之亭登文選之樓
眺昭明之館題三絕之碑爲鬢宮正矣尋師者以彌高
爲得故屢遷而不嫌修業者以日新爲益故舍舊而不
疑而無如邗州之有師錫壤之無師也撫其松檜如甘
棠焉閱其琴書如緇帷之坐焉徬徨周道如失其親然
吾聞之滁陽之山鴻溪之水皆先生之德也先生官於
此豈家於此哉昔沈旣濟以經學該明拜史官之職沈
景綽以兄弟名譽登司直之班君家文藻翩翩衣冠奕
奕如泉之源莫有旣焉於是張子元韞王子永照輩迴

波弄辭送之二泉之上曰揚子江中冷水非中夜操舟
不可得而今且引而灌之二泉也

全五二集

國朝尤侗錢十青詩序予於丁巳年客維揚訪錢鈞歷
於市中入其室湘簾棊几琴書成列聽其言灑如也殆
近於古之市隱者又有客以影索題攜木瓜相餉知爲
孟君易予嘗以小詩志之憶此踰十年矣今歲倦遊休
居有一少年翻然來謁問其名曰錢子十青問其族則
均慙之佳兒君易之快婿也坐間示予詩稿富有傑作
吾友鄧孝威吳茵次皆亟稱之且工描染爲詩中之畫
予竊心異之此未易才也予觀今日士大夫絕口不談

風雅以爲薦紳高致宜然乃一二山人遊客往往以塵
糟齷齪之詩沿門投贄眞鄭光業之苦海也有詩如此
不如無有若得錢子輩十數人落落點綴詞壇鼓吹音
韻何至有裸壤龔俗之譏哉嗟乎錢子固吾蘇人也而
寓於揚揚之先輩如豹人無言力臣蛟門諸君子皆爲
古人不可作矣近予所識有俞陳方顧書宣二子者皆
少年中佼佼者也盍以子詩質之

長齋倦稿

潘耒送趙天羽權關邗江序京朝官之奉使莫便於權
關關使者高牙列戟尊嚴與制府等千艘萬輶魚貫繩
引帖帖伏關下候進止不敢出聲息使者臨啟閉外遊

并傳七身集卷二十一
觀宴飲自如無他官牽掣其間國課既辦以其數之羨
供賓客辦資裝自足而無求安處而饒裕以故爲部曹
者人人爭欲得之趙君天羽才望爲諸曹最獨於權闕
恬然無欲行之意今年春關使者例當受代

天子重其選部推既有人復命舉擇才能於是趙君哀然爲舉
首得司權揚州賓客畢賀趙君不色喜其言曰今之樂
爲權使者舉未知爲關之難者也關者大利之所叢而
百弊之所集國家十數萬之緡錢歲歲仰給於是稅賦
之籍千條萬孔奸民猾吏窟宅其間張羅設機以吞噬
商旅商旅之良者既見侵牟其黠者又與吾吏相表裏

以虧損國課勢豪之舟叩關而求進者踵相接吾一切
裁以法則怨黷煩興否則若漏卮焉懼正供之不給曩
吾往來諸關見算緡者竭澤而漁取之盡錐刀焉吾心
傷之今也爲關而踵前人之陋傷廉毀仁吾弗爲也廓
然蕩軼置考課於度外又弗敢也

天子特命予爲是官必當有卓犖奇偉之績以報

國家若使其身圖而已非義之所敢出吾懼之不遑而又
奚喜余聞而嘆曰有是哉趙君之賢也不以便利差遣
爲榮孳孳以足國利商爲念不貪

天子之寵命而懼報稱之不逮推是心也能於其官可知矣抑

有進焉嘗聞諸吾友曰為關無他惟寬惟勤公私交濟不析秋毫之利以褻國體不張束濕之令以斂人怨是之謂寬閱符按籍必躬必親毋寄耳目於僕隸毋委成案於吏胥是之謂勤寬以濟勤勤以濟寬不盡利而利有餘不釐弊而弊自去是二者皆君之所優為敢以為贈君曰善遂出之以為送行之序 遂初堂集

汪懋麟贈揚州知府金公序淮以南臨大江控州府者一十有七惟揚為最大夙號難治我

國家體養三十餘載游臻太平士民恬熙商賈豐豫四方賓旅來遊來集守茲土者不勞而理

皇帝十三年春滇閩叛亂東南震驚揚人多惑易擾譌言道聽

家室朋奔城門夜開填衢泣路我公甫下車不急不縱既溫且和徐告吾民曰爾毋遽往曷興歸來盜伺於郊寇在萬里於是聞者感泣去者悉返自夏徂秋遂告無事公因興除其利不利於吾民者廉以約已明以聽訟勤以視事為政大體尤善用寬事以不廢

朝廷加意江浙爰命親藩帶甲數萬先後過揚一時酒食芻糗供具之屬取備俄頃動以萬計吏卒倉皇不知所出公曰無擾吾民單騎迎 王舟朝服拜岸上曰揚土水旱民實勞苦供給不備罪在知府 王咨嗟動色謂督

撫大臣曰知府賢揚因孔道

國家自用兵以來羽書露布道路相望南北走驛馬歷州縣夜鞭國門時刻不得悞悞者中軍法苟非其人鮮克勝任公治驛有方一呼百應郵傳不滯督撫大臣因交薦公才並條公實政請賜優擢

天子報可卽令觀察江甯蘇等處驛傳士民間之驚曰柰何奪我慈母不呼而集者數千百人謁督撫請駐揚州不忍公去也公勤學好交留心古名賢遺跡海內聞人及布衣之士相與文酒往來無虛日昔歐陽文忠公守維揚作堂平山爲郡巨觀後寢廢公毅然修復取材於官募

皇朝

役於工不徵一錢役一民閱月而堂成大召賓客車滿山谷遠近來觀者千餘人咸謂數百年無此事矣爲之歌詩紀其勝凡天下爲吏者偏於才則偏於事或多躁妄輕率之舉而民易擾齋於才則廢於事鹿鹿無所表見民有緩急無所倚二者處無事之時尚不可況一旦臨大利害軍興多故如今日乎若我公之才守之以靜穆出之以深沉以無事視有事使得公數輩爲

國家領封疆宣方畧東南之寇不足平矣豈僅賢司牧之任而已哉

百尺梧桐閣集

姜宸英廣陵唱和詩序廣陵古爲淮南雄鎮方其盛上

林瓊臺楊柳之隄龍鳳之舸表於重江複關之間而相爲縈帶諸公或建旄節盛參佐從四方奇士相與選勝賦詩賡揚太平而異時如韓魏公之與荆岐數公者賞花置酒一時主客之集後先繼秉大政傳爲盛事當天
下無事時仕宦者得以其間從容於游宴之樂而述爲
詩歌民生其間何大幸也然而烟塵稍警則淮南之受
兵必先如鮑明遠所謂通池夷峻隅頽者嘗聞世而一
見也而風啤雨嘯之場詩人之響或幾乎息矣然則詩
人之聚散非廣陵之所以盛衰而天下之治亂所從出
歟前世無論自明甲申乙酉之際載經殘馘余時過其

故墟蓬蒿蔚然淒涼滿目如此者幾二十年已太倉端
士王君之同年友新城王君貽上來佐斯郡始稍稍披
荆棘事吟咏用相號召君於其秩滿而去也以舡艫渡
江而相與登昭明之樓尋謝公之宅拂摩斷碣按行舊
壘一字之賞一石之奇必呶唔竟日而去故君之詩爲
絕句者至五十首殆浸淫乎供佛龍標而掇其勝者也
集成以示余余讀之喜曰此其太平之徵乎蓋自是廣
陵之風雅復振矣余客江北未嘗一詣新城陽羨陳子
其年爲余言王君見子文輒嘆息以爲作者今遇太倉
亦云余謝不敢然兩君知余余敢自謂不能知兩君乎

故於是集也粗述其所聞若新城之詩雖未暇合梓然其風流亦大畧可觀矣

湛園未定稿

箴

漢揚雄揚州牧箴矯矯揚州江漢之許彭蠡既瀕陽鳥攸處橘柚羽貝瑤琨篠蕩闔越北垠沅湘攸往獷矣淮夷蠢茲荆蠻翩翩昭王南征不旋人咸蹟於垤莫蹟於山咸跌於污莫跌於川明哲不云我昭童蒙不云我昏湯武聖而師伊呂桀紂悖而誅逢干蓋邇不可不察遠不可不親靡有孝而逆父罔有義而忘君太伯遜位基吳紹類夫差一誤太伯無祚周室不匡勾踐入霸尚周

之隆越裳重譯春秋之末侯甸叛逆元首不可不思股肱不可不孳堯崇屢省舜盛欽謀牧臣司揚敢告執籌

揚侍郎集

銘

宋韓琦揚州蓮花漏銘慶厯六年五月日揚州新作漏刻成知軍州事資政殿學士右諫議大夫韓琦乃爲銘曰天運雖大信則不踰智者善作器乃冥符以漏考辰始乎渴烏以箭定刻發乎金徒覆視晷景弗差毫銖節候旣正鐘鼓以符晝訪爾治夜宴爾居政則不怠監哉

挈壺

安陽集

元閻復瓶城齋銘

為淮東憲司知事凌德庸作

利慾之兵或隳吾城

躁厲之機或發吾瓶墨其守不若修仁義之干櫓金其

緘不若駕聖賢之說鈴若然則城可懼於脫局瓶何患

乎建瓴哉

元文類

明羅圭峯揚州譙樓鐘銘宏治五秋誰尸此州長清房

侯侯耳城譙惟鼓其朝亦鼓其宵宵朝匪鐘四紀春冬

民罹歲凶凶占厥聲民胥告鳴侯選屬能能簿馬進是

治是釁登簾斯震震聲四達實自侯發侯政桓撥撥災

為祥豐年穰穰地久天長

圭峯文集

解

唐韓臯廣陵解妙哉嵇生之為是曲也其當晉魏之際
乎其音商主秋聲秋也者天將搖落肅殺其歲之晏乎
又晉承金運商金聲也所以知魏云季而將代也慢其
商絃而與宮同音是臣奪君之意也此所以知司馬氏
將篡也司馬懿受魏明帝顧託後嗣反有篡奪之心自
誅曹爽逆節彌露王陵都督揚州謀立荆王彪母丘儉
文欽諸葛誕前後相繼為揚州牧故廣陵之地彼四人
者皆魏室文武大臣咸散於廣陵故名其曲為廣陵散
言魏氏散自廣陵始也止息者晉雖暴興終止息於此
也其哀憤躁感懼痛迫脅之旨盡在於是矣永嘉之亂

其應乎叔夜撰此將貽後代之知音者且避晉魏之禍所以託之神鬼也

文苑英華

賦

宋鮑照蕪城賦瀟迤平原南馳蒼梧漲海北走紫塞鴈門拖以漕渠軸以崑岡重江復關之隩四會五達之莊當昔全盛之時車挂轄人駕肩屢閉撲地歌吹沸天孳貨鹽田鏟利銅山才力雄富士馬精妍故能侈秦法佚周令劃崇墉列濬湏圖修世以休命是以板築雉堞之殷井幹烽櫓之勤格高五嶽表廣三墳三墳謂汝墳淮墳河墳也若斷岸矗似長雲製磁石以禦衝糊頰壤以飛文觀基

局之固護將萬祀而一君出入三代五百餘載竟瓜剖而豆分澤葵依井荒葛宵塗壇羅虺蜮階闕磨麗木魅山鬼野鼠城狐風啤雨嘯昏見晨趨饑鷹厲吻寒鷗嚇雛伏魑藏虎乳血殄膚崩榛塞路崢嶸古堦白揚早落塞草前衰稜稜霜氣兢兢風威孤蓬自振驚砂坐飛灌莽香而無際叢薄紛其相依通池既已夷峻隅又已頽直視千里外唯見起黃埃凝思寂聽心傷已摧若夫藻局黼帳歌堂舞閣之基璇淵碧樹弋林釣渚之館吳蔡齊秦之聲魚龍爵馬之玩皆薰歇燼滅光沈響絕東都妙姬南國佳人蕙心紈質玉貌絳唇莫不埋魂幽石委

骨窮塵豈憶同輿之愉樂離宮之苦辛哉天道如何吞
恨者多抽琴命操爲蕪城之歌歌曰邊風急兮城上寒
井徑滅兮丘隴殘千齡兮萬代共盡兮何言

鮑參軍集

唐蕭穎士伐櫻桃賦并序天寶八年予以前校理罷免
降資廣陵大府軍事任在限外無舍處寓居於紫極宮
之道學館因領其教職焉廟庭之右有大櫻桃樹高累
數尋條暢蒼蔚攢柯比葉擁蔽風景腹背微禽是焉棲
託頡頏上下喧呼甚適登其喬枝則俯逼軒屏中外斯
隔予實惡之鉅盜窺窬因是爲資遂命伐焉傲夫在位
者賦曰古人有言芳蘭在門不得不鋤眷茲櫻之攸止

亦在物之宜除觀其體異修直材非棟幹外森沈以茂
密中紛錯以交亂先羣卉以效諂望嚴霜以凋換綴繁
英兮霰集駢朱實以星粲故當小鳥之所啄食妖姬之
所攀翫赫赫閔宇乎之又乎長廊霞截高殿雲塞實我
君聿修祖德論道設教之筵宜乎蒔以芬馥樹以貞堅
匪夫松篠桂檜茝若蘭荃猗具美其在茲爾何德而居
焉擢無庸之瑣質蒙本枝而自庇汨羣材而非據專廟
庭之右地雖先寢之或薦豈和羹之正味每俯臨乎蕭
墻竅回得而窺伺諒何惡之能爲終物情之所畏於是
命尋斧伐盤根密葉剝攢柯梵朝光無陰夕鳥不喧肅

肅明明曠蕩乎階軒嗟乎草無滋蔓瓶不假器苟恃勢而相逼雖見親而益忌譬諸人事也則晉并吞於僭沃魯出逐於強季緜峻擅而吳削倫罔專而晉墜其大者虎遷趙嗣鸞竊齊位由履霜而莫戒聿堅冰而薦至嗚呼乃終古覆車之軌轍豈尋常散木之足議

文苑英華

李德裕金松賦并序廣陵東南有顏大師猶子舊宅其地卽孔北海故臺予今晚春夕景命駕遊眺忽觀奇木植於庭際枝似檉松葉如瞿麥迫而察之翠葉金貫粲然有光訪其名曰金松訊其所來曰得於台嶺乃就主人求得一本於平泉今聞封植得地枝葉茂盛敘其所

自作此賦賦曰青春已暮白日將夕經顏子之故巷訪孔公之舊宅美珍木之在庭得佳名於樵客曩擢本於台嶺近徙根於檐隙其柯肅肅可比於真松其葉纖纖實侔於瞿麥風入葉而成韻露垂柯而流液不受命於嚴霜諒同心於寒栢含春靄而葱蒨映夕陽而的爍疑翠尾之羣翔若金潭之旁射雜爽籟於簧竹混晶光於瑤碧奇樹以垂珠而擅名金松以潛穎而莫覲亦猶處子在於隱淪奇才遺於草澤我有衡宇依山岑寂類仲長之清曠如蕭宰之窮僻託根此地似有崖壁殊橘柚之不遷同甘棠之可惜庶封植於園林永愛玩而無斲

李衛公別集

宋孔武仲弔隋煬帝賦馳荒郊之北山莽悲風兮蕭瑟
哀隋家之荒主嘗南遊兮駐蹕時楊氏之方盛奄八荒
而爲一忘締構之艱難肆沉酣於燕逸平地沙兮敦海
高堂隱其陵日顧繁華之已空蔽葢棘而若櫛感興亡
之過速徒惆悵而涕零流螢集兮漢宮呦鹿乳兮周京
自古皆有此奚獨恨兮蕪城惜乎捨完固之圖就敗亡
之勢豈羣臣之尸素絕休嘉於獻替抑天奪而鬼瞰復
公言而自棄嗚呼楚澤丘墟雷塘草露鳧鶉涕兮秋聲
牛羊歸兮日暮迷樓欹傾過者誰顧乃爲文以弔之聊

以續乎阿房之賦

清江文集

秦觀歎二鶴賦廣陵郡宅之圃有二鶴焉昂然如人處
乎幽閑翹翮摧傷而不能飛翻雖雄雌之相從常悒悒
其鮮權時引吭而哀唳若對客而永歎圃吏告予曰此
紫微錢公之鶴也公熙甯時實守此邦心虛靈而體道
治清靜而忘言旣不耽乎豆觴又不嗜乎匏絃惟此二
鶴與之周旋居則俛仰於賓掾之後出則飛鳴乎導從
之先故鶴之來也則知使君之將至鶴之往也則知使
君之將還是以一郡之人好甚於姻敬甚於客如愛子
之居家若寵臣之在國晝從乎風亭之湄夜棲乎月臺

之側謂此幸之可常頗逍遙而自得逮公之去於今幾
時人各有好鶴誰汝私具名物於有口雞鷺易而侮之
傍軒楹而蒙叱厯階圯而遭麾惟昔時之故客間一遇
而嗟咨余聞而歎曰噫嘻有恃而生者失其所恃則悲
彼有啄乎巖莫之野飲於清冷之淵隨林邱而止息順
風氣而騰騫一鳴九臯聲聞於天若然者又豈衛侯之
能好而支遁之可憐哉

淮海集

王觀揚州賦并序揚州古都會也枕江臂淮與益部號
爲天下繁盛故古以來節鎮首稱揚益焉今夫廢興之
跡與夫風土人物貢賦并邑之纖悉詳見於傳記可得

而考因摭類次第而賦之辭曰天鬻先生溺意藝文絲
曰窮年柅蹠蹕之短步鬱遐情而不宣悵江淮之去來
閒走陸而航川徒跋跋而奚補寄艸色於頽顏睇故國
之荒蕪尚氣象之嶮岵思抽毫而弔歎傷日月之徂遷
環中文人推手而前曰子非無文何爲嗇辭華於一言
先生答曰去來於茲十厯春秋或行役之不遑或疹疾
之相嬰有所不暇丈人曰子今請邑此邦古今之廢興
人物之賢愚封域之遐邇土風之纖微貢賦之所出心
詳目熟益已周矣請子賦之吾將觀焉先生因驅撥冗
猥滌慮操觚放肆厥辭嗚呼歛歛策駉驢以出遊兮欸

近郊而驚春芳華冉冉以摧謝兮俄汎然而點塵稅倦
鞅於危岡兮俯樓欄而棲神哀衰殘之戟目兮發古意
之酸辛搜傳記之浩穰兮契口耳之傳聞稽質乎地誌
兮參諗乎乾文牽牛婺女流爲揚州南躡乎鉅海之滸
北壓乎長淮之流包有吳越首建楚州保章辨之以星
土之數職方分之以畜產之由茲惟陶唐置牧十二揚
居其中世濟以治夏因商襲九州以異惟周封建各正
其地季末解紐侯國爭利犬羊用人孰作藩衛嬴秦咄
嗟奄有神器煨燼墳籍變亂古制罷侯爲守郡縣始置
味形勢之孤弱薄恩親於子弟下更晉漢南北分裂隋

繼以興陳室復滅天下始一冠履有別易州而郡法制
未絕增置太平統以司隸有唐開府刺史分蒞此牧守
郡國先後變更而相異也環中丈人復曰茲述其概請
道其詳先生曰然執筆而前惟揚之先在周屬吳魯哀
之年城茲邗溝遠通江淮見於春秋後越滅吳角爲寇
讐強楚東侵廣地自謀抵於泗上雄視諸侯楚復奄滅
是爲廣陵顧始皇之蜂豺覽天下而并吞畧長世之遠
謀出須臾之經營郡始屬於九江本立異於虛名偉項
籍之姦雄置秦鹿兮相兵王英布而開國俄劉邦之勃
興革前人之故號易淮南之新稱或江都之更創或廣

增修身縣志卷二十一
陵兮相仍首皇子之啟封復沛侯之繼承彼得失之奚
計間逆叛之爲朋弔漢公之逡巡亦異號於江平踵三
國之紛紜作重鎮於魏邦強幹弱枝倚賢進良逮文帝
之黃初幸古城兮臨江奮山川之戎旅蒼烟藹之麾幢
志南渡兮已必卒冰舟兮莫航目波濤兮稽天奪神明
兮歎傷實皇天之限隔豈人力之能障浪賦詩於鞍馬
因縱美於湯湯曰魏曰吳名號相因統縣有八屬徐而
紛繁晉末之驅馳控三齊之要津逮宋有邦州鎮是隆
擇刺史以惟人俾撫柔於土風講盛事於嚴秋之月觀
巨濤於海陵之東俯江湄之壯濶瞰京口之穹崇歷齊

梁陳之累朝卒更革離合之不同一陳留而分郡一東
廣而啟封復吳州而異稱示屏衛於其中隋總管以名
府顧舊名而是從眷煬帝之纂圖詔修飾於離宮會殿
脚兮揮楫揚錦帆兮翳空決東幸而建都引千艘兮戲
龍戮忠臣而杜口括寡婦以從戎獻無尾之羔兮絕繼
作遭春之語兮凶終鵲巢黼帳血腥劍鋒徹牀簀以空
藏痛精誠之奚依指雷塘之漫漫仰楓林之巍巍本馳
情於一快反植禍於當時敕陳稜兮留鎮擁大軍兮北
歸眷天意之昌唐卒虬髯之見幾叱咤暗鳴作興帝基
承江淮之歸命更南袞以臨之外增置於行臺內維持

增修身縣志 卷二十一
於本枝武德而還宇縣緝熙或邗或揚陞號都督貞觀
之間十道分牧景雲開元增廢遙速採訪處置道路擊
轂繇延永泰之末建新節度之目救親王而領使慶皇
宗之敦睦副以長史權任戒獨跨豪華於天下駢十里
兮雲屋此州之因革名號之大較也擾擾後先興亡可
錄吳王濞之不臣非子建之就戮淮南安之自殺而始
惡彗星厲王長之憂死而民歌春粟非貪地以害公卒
三分而承續紀陟之譬護寒也知險要之必爭諸葛之
誅樂琳也表誣辭而自贖文欽之叛也因曲赦以示恩
曹丕之走也駭疑城之在目沈慶之設強弩於高臺兮

謹守備禦吳孫權置烽火於孤山兮驗夫神速蔣濟諷
三州之論袁術哀馮氏之辱李子通之暫據杜伏威之
驅逐彼公祜之何知運螳臂以相觸力未加而已喘息
未伸而已促委雉堞於荆榛痛黔黎之魚肉徐敬業之
傳檄兮武后臨朝而嘅嘆田神功之提兵兮劉展就擒
而顛覆陰奏伯和之罪兮少游之凶狡外匱南方之力
兮李錡之貪黷唐控失御昭皇蒙塵屬朱梁之侮國復
黃巢之不臣沸淮海之狂波漲寰宇之妖氛迨吳僭王
楊氏始振行密亟亡渥溥稱尊兵弱地狹氣卑識昏亦
猶指尾閭而瀦去水卽虎穴而寄蒸豚未有不亡者也

夫然迭守迭攻代亡代存方東都之啟國倏大齊之自
君始焉懼神謀之或泄默然晝燼灰而誑人咄嗟高駢
跳吠狺狺叱海嶽以倒立噓風雨兮晝昏忽埋金之行
厭終故氈兮裹身呂用之之狂妖畢師鐸之并吞孫儒
厲言於庸賊秦彥伏劍於轅門時雨降矣雖灌溉兮何
益太陽昇兮顧小星兮徒云顯德興周淮南克復撲燎
原之凶燄起摧風之腐木赫赫然我太祖之興也不取
一毫不折一鏃何重進之跳梁逆神鋒而自劔按九天
之成法斷巨鼉之左足捧祥日以出海乘鳴雞而御籙
民適父母天薦福祿冠帶百蠻兮蠢然集慕羶之眾蟻

玉帛萬國兮浩然收朝宗之百谷士歸民耕野無鬼哭
括有幅員悉吾臣僕銷藩鎮之僭謀亶皇明而外燭敕
示守臣語吾約束掃戰爭之故地變歌謠之善俗此州
之聖愚興亡之明戒也長岡巖嶙西馳東走懍劍外之
危勢吞淮天之遠岫帶楚水之縈盤瞰吳林之怪秀巨
魚乘波偃然出壑長虵吸烟翹然引首高焉上摘於星
辰廣焉環迷於宇宙四帳無所兮失迷藏之樓萬點猶
明兮餘放螢之囿乏擊毬之壯女悲喪馬之龍廡帝子
去久兮空文選之樓雨蘚朝生兮侵蜀泉之磬風飄飄
兮引竹西之歌吹雨纖纖兮發貢芽之香茂塔棲靈兮

北傳古身集元 卷二十一
五
軋空池九曲兮分溜杜子美思東流而乘興朱長文目
西山而懷舊風亭月觀琴室吹臺屹萬歲之雕華對鐘
山之崔嵬待玉鈞之初月銷丹檻之大雷走十宮之狐
狸鞠三靈之草萊魏水軍兮穿巨池而分浦隋醮戲兮
揭羽葆而橫街仙曰尚存兮混草莽之墟蛋骸未朽兮
感金玉之精植檜荒謝公之宅掬泪傳秋浦之情筮山
火以疑寺名之妖祥驚夢寐以登峻臺之崢嶸望輿浦
兮表瑞始乎范邈峙危城兮興築本乎張嬰孫郎作徐
塘而淹北道齊高分巨水而遏艾陵此州之城邑山川
樓觀之所在也所以庾闡縱麗言於禦寇鮑照攄雅思

於蕪城因獻賦以賜錢兮酬王正之才聞宮聲而疑變
兮見令言之明客謝并兮起盧仝之意表薦士兮示蕭
遙之能張祐著浪遊之跡杜牧悲薄倖之名箴告執籌
兮揚子雲之慷慨詩弔故宮兮李義山之縱橫訪木蘭
兮偉王相國之貴鍍金鞍兮陋章孝標之輕子瑱據城
而生叛逆之志嵇康鼓琴而識禍亂之萌騎鶴謂昔人
之妄露筋哀正女之誠大中紀年兮獲官河之聖米韋
生避地兮悲水調之遺聲此州之古今賢哲之所褒稱
而悲歎也揚揚水波人實躁勁或土多篠蕩之本或地
宜楊柳之性厥田惟下天草惟盛利焉金錫之爲美民

焉男女之爲正馳騷社之湖兮夜駭乎明珠之光怪汎
揚子之心兮朝出乎寶鑑之精瑩袍美蕃客布出鮫人
半臂美錦土穀花紋烏節早香地粟連根蒟蒻斤笋蘆
芽水芹海榴石楠松藻葵蕪菰粉白芷松栢葛薑芡觜
翻刺蒲劍飛鏗鶉鴨鶴雉狐貉兔獐野不利穀畜不宜
羊鰕鯁鮓鰕鱖鯉鱠龜鼈鼉蜃蛤蝠魴螺蚌螳蠓
獮殼堅剛五都十郡千豪萬商趨牀頭之冗會定萬貨
之低昂天長甘泉蓮塘石梁積冬雪之綏綏乘春霖之
浪浪泥水土陷輪摧馬傷張氏記明於行殺李巡注釋
於輕揚采得寶之歌兮韋堅進官於常侍興壯埭之役

兮謝安獲美於甘棠奇乎哉瓊花吐英芍藥矜芳媚靈
宇以敷秀覆修亭而舞香其潔也御綠雲之玉妃其美
也奔素月之仙粧其色也照時春之藻景其馨也破眞
室之罌香友魏黃於西洛奴玉藥於唐昌至於雜樂奇
戲歌僮舞倡結荳蔻之春梢艤珠簾之密航九橋連居
善和名坊楊柳發孫生之句牡丹爲李氏之光姓系之
出其源章章劉馬鄭盛韓林車張戴高槐游茅冷蕭王
此風俗物產氏族之所出也兩京而降五代以還人物
之詳善惡可觀微至於棲巖遁谷之士下至於羈臣寡
婦之賢董子諫易王之驕志何武寬戴聖之微愆吏民

刻石頌馬稜而懷德祠祀祈福祝張綱而致虔趙苞成
三年之政徐璆謝上公之官劉馥先一時之備出苦蕘
而復壘陳登當東方之事合部眾以安邊事大見委兮
責溫恢之效以函致問兮尊劉曄之言政治尤異三府
薦臧旻之績鎮撫安靜郭謀言滿寵之德張玄不逮子
綱而雅有高行張遼至自海陵而今猶血食竿融利財
奉佛而忘督運之急孫景委郡東歸而得見幾之力陳
瑀懼袁術之集兵周瑜識蔣幹之說客陸伯言之先幾
而知楊竺之終敗糜子仲之傾財而資先主之軍食器
中鬻茗而老姆不聞於增減帷下燕客而桓溫恥崇於

雕飾劉頌博識而見稱時人盛彥異才而不應召辟華
譚好學而取貴乎鄉里惠休復姓而晚階乎仕籍開南
門而必王兮恭陵胡爲乎反禍實根本之所寄兮劉氏
於焉而深惜荀伯玉夢稚兒之語呂僧珍遇相師之識
白虹貫城而義慶以之懇還十年養士而季崇以之破
敵老能馳射者傅永之好勇畏如神明者蕭景之舉職
方隋之時趙才裴矩之從幸其止輦抗辭毅然而不佞
志一朝兮已決言百車兮孰聽指血染鞅兮徒爲乎官
女之留輿服羽儀兮徒爲乎何稠之定李襲譽非特築
句城以興利也復聚書而訓子王志愔豈惟破凶猾以

增補甘泉縣志 卷二十一
示信也先保民而爲政參佐不用明李鄴之失郡人紀
德見姚崇之正倪若水因班公而有登仙之慕陸鴻漸
對季卿而別中濕之性南柯駭淳于之夢沙隄發李榮
之詠臧珍對世宗言卑濕之狀田頽諫楊氏喻狂猛之
心賈崇失律懼元宗而受責馮謐削髮遇周師而見擒
環中丈人曰子之博聞吾已詳知子之凭高睨下或得
於古或得於今人之所不能見而知者試爲陳之先生
怡然布席揖座觴三行而已醺徐爲丈人言之引目迢
迢邈不知其所極也撫心迴迴恨不知其所至也倏隆
倏平關絕頽危勢相揆而不屬者此前日之廢城遺堞

也斜分直出東西左右而名不質其孰謂者此前日之
市朝街陌之故處也殘刻斷礎燒昏草沒而牛羊牧放
之所憑陵而上下者此前王之離宮別殿也纍然而峙
訝然而空穴狐鼠宅虺蜴及於人跡之所不及者此前
賢昔帝之壞陵廢冢也前日之綺羅鼓吹之坊今日之
耘童樵叟之歌場蔬圃也前日之官寺法度之所出今
日之浴牛飲馬之斷溝荒塹也齊綠高陰局分而并列
者此焚麻桑柘高下之畦隴也似出而沒若來而去非
圖繪筆墨之所可形容而盡者此荒烟野霧朝暮之氣
候也茂林陰陰挂晴日也白鷺翩翩獻平池也遠水沄

增修古身縣志 卷二十一
汙艤漁舫也羣山亭亭帶長江也疏花綴草天天灼灼
訴春情也修篁舞烟曳曳徐徐縈客愁也怒蛙沸雨怪
禽嘲暮行商去賈千蹄萬檣南浮而北走者不能誰何
其一二也是以思紛然而蕩越斂而不能相合言屑然
而蹂冗就而不能少功夫然景物之夥不爲夫人道也
敢肆其所可道者丈人姑聽之因屏息整衣受揖而立
端以俟命皇乎哉我太祖之有天下也近賢黜愚定羌
服吳分茅列土而啟十友之封銜璧輿觀而赦諸王之
誅萬里一統混同車書粵茲惟揚古曰名都屏扞京師
世倚賢儒唐季凋微羣雄角趨寄人命於戈鋌委城雉

於榛蕪誅殺蹂躪培削驅呼政察察而不綱下嗷嗷而
無餘一祖經營四聖扶持逮皇上之興也天覆地容風
養雨濡振歷世之衰殘造太平於須臾四海九牧稱唐
頌虞士樂膠庠商通有無工事於器民安厥居老舞少
歌其氣於於實惟神州東南奧區併邑里而簡役廢軍
壘以寬租江浙歐閩交廣湖湘舳艫銜尾駢走津途蓋
鑒前季之興亡建永世之規模儲粟穀之千倉宿驍雄
之萬夫擇將臣以嚴訓御之法制尊牧守以絕鷹虎之
侵漁淬蘭錡之戎械增堅金之外郭崇中國之藩垣銷
姦人之覬覦言未及既環中丈人委杖出席拊髀小雀躍

失氣出口乃曰賦者古詩之流古人所以通諷諫也今先生之言磊落崢嶸豈特詳一州之事舉而措之足以彌縫帝袞龜鑑當時天鬻先生跼蹐戰汗况不知其所如百拜以謝定色悉記將以俟采詩者也

天鬻子府元集

明李滢後蕪城賦原夫斗野攸分楚甸載闢襟帶江淮控引蠻貊輕揚紀於職方嵒竄稱於史冊其盛衰得失之故見於齊梁以前者明遠之賦言之詳矣隋氏代興南北混一煬帝篡奪志在淫佚乃鑿汴渠爰達江國錦帆龍舟千里蔽塞遼左喪師江都是卽罔念瘡痍敢號饑溺項昇獻制遂造迷樓金楹玉柱蓬島丹邱齊雲落

星不足比臨春結綺未堪侔吳姬越女皓齒明眸服則鮫鮪火浣食則海錯山羞朝吟蛺蝶暮彈箜篌花作剪裁之戲曲名清夜之遊大業之末四海怨叛歌吹成空千戈瞽亂焰吐凌風之臺草荒卻月之觀愁鴟嘯夫玉鈎飛鳶啄夫金彈李唐御宇重鎮肇興鹽鐵轉運俱治廣陵高檣巨艦畫戟彤旌逮於中葉殷盛日增青楓拂乎曲巷綠嶼映乎雕甍纖腰間夫長袖玉珮雜夫繁纓香靄芙蓉之帳花圍雲母之屏管絃達旦兮別院燈火不夜兮層城揚一益二誇美汗青安史煽禍五季嗣作舞榭淒涼歌臺寂寞高楊之間兵燹相錯青燐火兮迎

仙之樓碧土花兮延和之閣嗣宋室之開基號富完而
安樂條中葉之播遷遽淪陷夫河洛憶靖康之駐蹕暨
完顏之肆虐飛礮碎兮綺羅箭鏃輦兮簾箔灣頭之哨
馬幾過制置之孤軍被縛遺骸零亂於邱墟戰血漂流
於城郭千載聞之涕淚爲落明興甯晏近三百年大農
資漕渠之飛輓縣官賴鹽筴之貿遷輪蹄輻輳商賈喧
闐朱樓十二粉黛三千春花旖旎秋草芊眠流蘇晝掩
水沉宵燃締新觀而密勿懷往眷而纏緜至於水湧皓
月山銜斷雲修禊競渡士女繽紛嗣法曹之逸響賡枚
叟之雄文憶曩日之繁盛每夢遶於蘭薰啟禎之未寇

盜四起燕都不守強藩至止兵日驕滌民盡瘠疥蹇蹇
史公盡瘁國事鐵騎驟馳雉堞條燬碧血濺於川原紅
顏淪於邊鄙至於今日荒烟遍野旅穀盈庭雞臺之綠
蟻誰泛螢苑之青莎自生豈非樵牧所酸鼻詞客所傷
情哉爰爲歌曰江海灌注古維揚兮龍舟鳳舸侈隋煬
兮玉簫水調流風長兮燼滅烟消日淒涼兮狐烏夜號
告不祥兮忠貞淪沒民流亡兮抗懷千載徒茫茫兮
彭桂後蕪城賦粵禹貢之建邦肇揚州之分域瞻斗牛
以高懸注江海而下瀉總八閩百越之區極交廣滇黔
之國道里遼袤山川紆鬱伊廣陵之舊都惟淮南之首

增修身鼎記 卷二十一
邑握乾樞以南旋挽坤軸以左剖析經緯而辰移限寒
暑而氣易扼淮泗以爲喉挾金焦而在腋梯航通朝會
之塗閭閻雜方隅之譯煎波囂鹵田之夫鑄山冗銅官
之卒長安蔽日翳馬塵而霧起京口迴颿駭江潮而峯
立由波濤之中斷常宇宙之瓜裂是用崇其樓櫓屹其
螯臂烽火接黑山之雲斥埃走黃河之雪當關壯搏虎
之雄臨江防飲馬之竭若其南障則有如北軍左袒安
劉平勃千里重扃鎖固鑰密寢室之中安枕帖席其或
北引則有如斷臂絕吭和扁無術房闔洞開粲見羅列
投鞭叱渡荷檐翹匿故其盛也日麗廣衢花紛曠野紅

櫺綠牖家明翡翠之簾碧棟朱甍戶耀琉璃之瓦雕欄
十二重樓夾美人之居繡轂三千狹巷下王孫之馬捲
箔而珍珠亂篩拂樹而珊瑚盈把舞帷響玉珮以遙鳴
酒市灌銀河而倒瀉翫目綺靡蕩心游冶足使公子戀
而弗去君王慕而欲來聞歌吹之繚繞駐魂夢以徘徊
及其衰也驅朔馬以渡河揮吳戈而指闕千里樅金萬
甲浴鐵據要害以必爭羅瘡痍而獨烈草深荒壘方驚
鼓死之聲日黯空城已斷行人之跡萬家烟火崇朝而
化燼銷塵百世烝黎一旦而膏鋒葬鏑高人斂跡不待
避秦之年志士愴心豈在沼吳之日是雖天道之使然

夫亦地形之致此氛高殺氣之衝災逢國運之否悲涼
申於事後怨毒叢於禍始以彼遷鼎去夏抱器亡殷墟
嗟洛社棲恤周京蛙產晉陽之竈魚入大梁之城白雉
辭秦誰祠陳寶赤蛇藏漢不祚卯金馘流尸而塞睢水
阬降卒而甯長平未足方斯芟酷擬此塵爭鏟遺宮於
瓦礫瘞殘郭於榛荆逮千年而屢見或數紀而頻經溯
盛衰之互迹察感召之微形披遺文而愴目停過客以
傷心旣騷騷而唁古遂脉脉以悲今若夫凜縱安劉建
瀕胥戕公路刻璽子桓憑江羽扇麾而敏敗龍驤濟而
吳亡慶之明徹之勲績臨海竟陵之猖狂爭邊疆於宋

魏擾干戈於齊梁固已感昔賢之浩嘆尙未覩後事之
蠹傷迺有長城國破大業祚窮厭洛陽之西苑思楊子
之離宮鑿汴渠而翔鷁捲江水以纏虹清吹月中帶笙
歌而上馬畫船波上夾羽葆以迎龍錦纜牙檣穿過柳
隄之綠鳩頭雉尾行看殿脚之紅來夢兒嬌不慣司農
鳥喚迷樓路杳惟隨任意車逢月觀凭肩正說東宮故
事雞臺勸飲竟忘南國妖容如何好夢遂有圖儂彭城
進帛阿廢命終於時螢銷山火花謝楊枝落鈿瑟瑟荒
黍離離笑三十六封之書牀頭未啟弔二十四橋之夜
月下無歸塵埋玉盃塚繫珠恩雷塘永閉石馬常嘶更

增修五身集卷二十一
有凍雀唐衰野雉來集唾高呂之狂駭逞畢秦之兇孽
騎木鶴於庭中械銅人於斗側披羽衣而未仙設骨確
而相食致孫楊之血戰迄周唐而交兵勇著令坤之烈
忠垂庭芝之名前有白甲後有紅巾自宋遷而金侮迨
元替而明興莫不骸高阜勢血怒濤鳴瘦烟晨斷肥草
寒生黃沙自暗白日難明伊昔賢之未邁故感悼而不
深使九原而今作倍飲泣其吞聲邇尤百六屯逢陽九
厄會邦域分崩河山破碎識漢祚之已傾守殷頑而不
悔冀卽墨之可堅遂聊城之莫說豈襄樊之無援致睢
陽之終壞鼓角多驚梯衝忽潰延頸就誅抗命問罪於

是啣鬚伏刃斷腰膏斧掬指盈舟衿甲面鼓巷血有聲
門骸自拄荒城梟噪空屋鼠語尸蟲欲出蠅弔客而在
堂腐肉安逃鴉啄腸而上樹車前懸頭馬後載婦痛死
夫之難求恨生女之不脯風寒白晝聽黑獄以魂嘶雨
暗黃昏見青燐之鬼聚誰爲叢塚卽金鋪玉砌之家欲
問弩臺遍螢苑邗溝之路孰不遙憐草紫共泣楓丹驚
烏啼之夜曲慘花樹之春顏掩周骸而未盡招楚些而
莫還有酒澆愁難消怪哉地下無家寄怨空聞歸去人
間霜飛六月碧化千年逆流上柱懷悵入泉悲蒿里之
聚歛歌薤露以泣然夫何二十載之風景易邁百萬家

之烟景重來雖燕子堂前主非王謝乃兔園席上客復
鄒枚更逐香車過蕙晚蘭阜之坂還開金埒上鬪雞戲
馬之臺朱邸倡家紅橋酒舍夢愛朝雲歌憐子夜清笳
林外瑤琴花下羅衣春換貂裘寒借草帶裙拖山痕眉
畫墮珥相尋彈箏不暇逐鴛鴦以橫飛調鸚鵡而初罷
既蕭瑟之已忘謂歡娛之可乍彼夫董子祠荒文選何
在謝公宅圯甲仗無遺木蘭院中不護紗籠之壁瓊花
觀內會非后土之祠明月樓空悵吳興佳麗之句平山
堂廢懷永叔風流之詞雨爛杏花之村烟蕪芍藥之圃
五泉井寒四并亭仆誰吟東閣官梅莫識竹西遺路羌

勝蹟之多堙渺前徽而已暮獨有淮南遊子江左書生
晨齋愁以遠眺宵銜恨而遐征極古今於一瞬叩蒼穹
而長吟誰使登高彌望縱日平臨觀江山之舊慨風物
之新察天地殺生之柄觀朝市遷廢之因舞榭歌臺重
芟蔓草黍苗棘子久種宮庭繁華難恃衰變相尋而還
悲隋苑再賦蕪城者乎

府舊志

詩

魏文帝至廣陵於馬上作觀兵臨江水水流何湯湯戈
矛成山林玄甲耀日光猛將懷暴怒膽氣正縱橫誰云
江水廣一葦可以航不戰屈敵虜戢兵稱賢良古公宅

岐邑實始翦殷商孟獻營虎牢鄭人懼稽顙充國務耘
植先零自破亡興農淮泗間築室都徐方量宜運權畧
六軍咸悅康豈如東山詩悠悠多憂傷

魏文帝集

宋謝莊江都平解嚴肅旗簡廟律聳鉞暢乾靈朝晏推
物泰道渥抃身寧擊轅歌至世撫壤頌惟馨

謝光祿集

梁陰鏗廣陵岸送北使行人引去節送客艤歸艫卽是
觀濤處仍爲郊贈衢汀洲浪已息邗江路不紆亭嘶背

樾馬檣轉向風烏海上春陰襍天際晚帆孤離舟對零
雨別渚望飛鳧定知能下泪非但一楊朱

陰常侍集

梁沈約贈廣陵太守王湛詩持身非詭遇應物有虛舟

心從朋好盡零落委山丘

沈東陽集

隋煬帝泛龍舟舳艫千里泛歸舟言旋舊鎮下揚州借

問揚州在何處淮南江北海西頭六轡聊停御百丈暫

罷關山歌棹謳詎以江東掌間地獨自稱言鑑裏游

隋煬

帝集

虞世基奉和幸江都應詔南國行周化稽山祕夏圖百

王豈殊軌千載協前謨肆觀遵時豫順動悅來蘇安流

進畫舸戒道翼金吾龍旂煥辰象鳳吹溢川塗封唐昔

敷錫分陝被荆吳沐道咸知讓慕義久成都冬律初飛

管陽鳥正銜蘆嚴飈肅林薄暖景澹江湖鴻私浹幽遠

厚澤潤凋枯虞琴起歌詠漢筑動巴歛多幸霑行葦無庸類散樗

全唐詩

孫萬壽早發揚州還望鄉邑鄉關不再見悵望窮此晨山烟蔽鍾阜水霧隱江津洲渚斂寒色杜宇變芳春無復歸飛羽空悲沙塞塵

文苑英華

煬帝宮人杭靜迷樓夜半歌江南楊柳樹江北李花榮楊花飛縣何處去李花結果自然成

彤管遺編

唐盧僎稍秋曉坐閣遇舟東下揚州卽事寄上族父江陽令虎嘯山城晚猿鳴江樹秋紅林架落照青峽送歸流歸流赴淮海征帆下揚州族父江陽令盛業繼前修

文掩崔亭伯德齊陳太丘時哉惜未與千載且爲儔憶昔山陽會長淮東海游稱觴阮林下賦雪謝庭幽道濃禮自畧氣舒文轉適高情薄雲漢酣態坐芳洲接席復連軫出入陪華輶獨善與兼濟語默奉良籌歲月歡無已風雨暗颺颺掌憲時持節爲邦邈海頭子人惠雖樹蒼生望且留微躬趨直道神甸忝清猷仙臺適西步蠻徼忽南浮宇內皆安樂天涯獨遠投忠信徒堅仗神明豈默訓觀生海漫漫稽命天悠悠雲昏巴子峽月遠吳王樓懷昔明不寐悲今歲屬周喟無排雲翮暫得杼離憂空灑霑紅泪萬里逐行舟

全唐詩

增修甘肅通志 卷二十一
許敬宗江令於長安歸揚州九日賦心逐南雲逝形隨
北雁來故鄉籬下菊今日幾花開 同上

宋之問傷王七秘書監寄呈揚州陸長史通簡府僚廣
陵好事王氏貴先宗衡門棲道風得心晤有物乘化遊
無窮學奧九流異機玄三語同書乃墨塲絕文稱詞伯
雄白屋藩魏主蒼生期謝公一紙賢良詔遂謁承明宮
補袞望奚塞尊儒位未充罷官七門裏歸老一邱中嘗
忝長者徹微言私謂通我行會稽郡路出廣陵東物在
人已矣都疑淮海空 同上

王昌齡客廣陵樓頭廣陵近九月在南徐秋色明海縣

寒烟生里閩夜帆歸楚客昨日度江書爲問易名叟垂
綸不見魚 文苑英華

李頎琴歌揚州送別主人有酒歡今夕請奏鳴琴廣陵
客月照城頭烏半飛霜棲萬樹風入衣銅爐花燭獨增
輝初彈綠水後楚妃一聲已動物皆靜四座無言星欲
稀清淮奉使千餘里敢告雲山從此始 全唐詩

劉長卿送子婿崔真甫李穆往揚州四首渡口發梅花
山中動泉脈蕪城春草生君作揚州客 半邏鶯滿樹
新年人獨還落花逐流水共到茱萸灣 雁還空渚在
人去落潮翻臨水獨揮手殘陽歸掩門 狎鳥攜稚子

釣魚終老身殷勤囑歸客莫話桃源人

劉隨州集

前人茱萸灣北苔崔載華問荒涼野店絕迢遞人烟遠
蒼蒼古木中多是隋家苑

同上

前人更被奏留淮南送從弟罷使江東又作淮南客還
悲木葉聲寒潮落瓜步秋色上蕪城王事何時盡滄洲
羨爾行青山將綠水惆悵不勝情

同上

王冷然隋隄柳隋家天子憶揚州厭坐深宮事遠遊穿
地鑿山通御路鳴笳疊鼓泛春流流從鞏北河汾口直
到淮南種官柳功成力盡人旋亡運謝年移樹空有當
時彩女侍君王帳殿旌門對柳行青葉交垂連幔色白

花飛散染衣香今日摧殘何用道數里曾無一株好驛

騎江帆損更多山精鬼魅藏應老涼秋九月路為霜日

夜孤舟入帝鄉沙畔青青聞落木宮中無個不沾裳

輿圖

故蹟詩

孟浩然廣陵別薛八士有不得志棲棲吳楚間廣陵相
遇後彭蠡泛舟還櫓出江中樹波連海上山風帆明日
遠何處更追攀

孟襄陽集

杜甫湖南送敬十使君適廣陵相見各白頭其如離別
何幾年一會面今日復悲歌少壯樂難得歲寒心匪他
氣纏霜匣滿冰置玉壺多遭亂實漂泊濟時曾琢磨形

增修甘泉縣志 卷二十一
容吾校老膽力爾誰過秋晚嶽增翠風高湖湧波騫騰
訪知已淮海莫蹉跎 杜少陵集

韋應物淮上卽事寄廣陵親故前舟已渺渺欲渡誰相
待秋山起暮鐘楚雨連滄海風波離思滿宿昔容髻改
獨鳥下東南廣陵何處在 韋蘇州集

前人送元倉曹歸廣陵官閑得去住告別戀音徽舊國
應無業他鄉到是歸楚山明月滿淮甸夜鐘微何處孤
舟泊遙遙心曲違 同上

前人送魏廣落第歸揚州下第常稱屈少年心獨輕拜
親歸海畔似舅得詩名晚對青山別遙尋芳草行還期

應不遠寒露濕蕪城 同上

前人廣陵遇孟九雲卿惟藩本帝都遊士多俊賢夾河
樹鬱鬱華館千里連新知雖滿堂中意頗未宣忽逢翰
林友歡樂斗酒前高文激頽波四海靡不傳西施且一
笑眾女安得妍明月滿淮海哀鴻逝長天所念京國遠
我來君欲還 同上

李嘉祐潤州楊別駕宅送蔣九侍御收兵歸揚州冷氣
清金虎兵威壯鐵冠揚旌川色暗吹角水風寒人對輜
輶醉花垂睥睨殘羨歸丞相閣空望舊門闌 臺閣集

岑參送揚州王司馬君家舊淮水上到揚州海樹青

增修古身集卷二十一
官舍江雲黑郡樓東南隨去鳥人吏待行舟爲報吾兄
道如今已白頭 岑嘉州集

顧況送大理張卿之廣陵春色依依傷解攜月卿今夜
隔隋隄白沙洲上江籬長綠樹村邊謝豹啼遷客本來
無倚仗故人相去隔雲霓越禽惟有南枝分目送歸鴻
飛向西 通翁集

高適廣陵別鄭處士落日知分手春風莫斷腸興來無
不愜才在亦何傷溪水堪垂釣江田耐插秧人生只爲
此亦足傲羲皇 高常侍集

錢起送萬兵曹赴廣陵秋日思遠客臨流語別離楚城

將坐嘯郢曲有餘悲山晚桂花落江寒蘋葉衰應須揚
得意更誦長卿詩 考功集

韓翃送蔣員外端公歸淮南淮南芳草色日夕引歸船
御史王元貺郎官顧念先光風干日暖寒食百花然惆
悵佳期近澄江與暮天 韓君平集

前人送陳明府赴淮南年華近逼清明落日微風送行
黃鳥緜蠻芳樹紫驢躑躅東城花間一盃促膝烟外千
里含情應渡淮南信宿諸侯擁旆相迎 同上

皇甫冉送田濟之揚州赴選家貧不自給求祿爲荒年
補調無高位卑棲屈此賢江山欲霜雪吳楚接風烟相

去誠非遠離心亦渺然 皇甫補闕詩集

朱長文春眺揚州西岡寄徐員外蕪城西眺極蒼流漠

漠春烟間曙樓瓜步早潮吞建業祿山晴雪照揚州隋

家故事不可問鶴在仙池期我遊 同上

戴叔倫送萬戶曹之任揚州便歸舊隱擬歸雲壑去聊

寄宦名中俸祿資生事文章實國風聽潮回楚浪看月

照隋宮儻有登樓望還應伴庾公 文苑英華

盧綸送魏廣下第歸揚州楚鄉雲水內春日眾山開淮

浪參差起江帆次第來獨歸初失桂共醉忽停盃漢詔

年年有何愁掩上才 盧戶部集

李益懷古故國歌鐘地長橋車馬塵彭城閣邊柳偏似

不勝春 李君虞集

前人揚州送客青楓天半白蘋洲楚客傷離不待秋君

見隋朝更何事柳楊南渡水悠悠 同上

李端送魏廣下第歸揚州寧親遊宦今空返浮淮一雁

秋白雲陰澤國青草遶揚州調膳過花下張筵到水頭

崑山仍有玉歲晏莫淹留 全唐詩

楊凝送別春愁不盡別愁來舊泪猶長新泪催相思倘

寄相思字君到揚州揚子迴 同上

崔峒揚州選蒙相公賞判雪後呈上自得山公許休耕

海上田漸看長史傳欲棄釣魚船窮巷殷憂日蕪城雨
雪天此時澹相對心事比旌懸 文苑英華

韋述廣陵送別宋員外佐越鄭舍人還京朱紱臨秦望
皇華赴洛橋文章南渡越書奏北歸朝樹入江雲盡城
銜海月遙秋風將客思川上晚蕭蕭 同上

前人揚州尋張籍不見別後知君在楚城揚州寺裏覓
君名西江水潤吳山遠却打船頭向北行 同上

劉商送薛六暫遊揚州志在乘軒鳴玉珂心期未快隱
青蘿廣陵行路風塵合城郭新秋砧杵多 劉虞部集

司空曙送嘉祐正字括圖書兼往揚州觀省不事蘭臺

貴全多韋帶風儒官比劉向使者得陳農晚燒平蕪外

朝陽疊浪東歸來喜調膳寒筍出林中 文明集

權德輿廣陵詩廣陵實佳麗隋季此為京八方稱輻輳

五達如砥平大旆映空色笳簫發連營層臺出重霄金

碧摩顥清交馳流水轂迴接浮雲薨青樓旭日映綠野

春風晴噴玉光照地顰蛾價傾城燈前互巧笑陌上相

逢迎飄飄翠羽薄掩映紅襦明蘭麝遠不散管絃閑自

清曲士守文墨達人隨性情茫茫竟同盡冉冉將何營

且申今日歡莫務身後名肯學諸儒輩書牕誤一生 權文

公集

增修古泉縣志 卷二十一
陳羽廣陵秋夜對月卽事霜落寒空月上樓月中歌唱
滿揚州相看醉舞倡樓月不覺隋家陵樹秋 全唐詩

歐陽詹九日廣陵同陳十五先輩登高懷林十二先輩
客路重陽日登高欲上樓風烟今令節臺閣古雄州泛
菊聊斟酒持萸懶插頭情人共惆悵良久不同遊 同上

劉禹錫酬樂天揚州初逢席上見贈巴山楚水淒涼地
二十三年棄置身懷舊空吟聞笛賦到鄉翻似爛柯人
沈舟側畔千帆過病樹前頭萬木春今日聽君歌一曲
暫憑杯酒長精神 劉中山集

前人揚州春夜同會水館夜艾獨醒寂寂空看金燼落

紛紛只見玉山頽自羞不是高陽侶一夜星星騎馬回

同上

盧仝揚州送伯齡過江伯齡不厭山山不養伯齡松顛
有樵墮石上無禾生不忍六尺軀遂作東南行諸侯盡
食肉壯氣吞八紘不啣溜鈍漢何由通姓名夷齊餓死
日武王稱聖明節義士枉死何異鴻毛輕努力事干謁
我心中未平 玉川子集

白居易洛下送牛相公出鎮淮南北闕至東京風光十
六程坐移丞相閣春入廣陵城紅旆擁雙節白鬚無一
莖萬人開路看百吏立班迎閩外君彌重樽前我亦榮

何須身自得將相是門生

長慶集

元稹蒼溪縣寄揚州兄弟蒼溪縣下嘉陵水入峽穿江到海流憑仗鯉魚將遠信雁同時節到揚州

同上

李德裕奉送相公十八丈鎮揚州千騎風生大旆舒春江重到武侯廬共懸龜印銜新綬同憶鱸庭訪舊居取履橋邊啼鳥換釣璜溪畔落花初今來却笑臨邛客入

蜀空馳使者車

李衛公集

王播淮南遊故居感舊酬西川李尚書德裕昔年獻賦去江湄今日行春到却悲三徑僅存新竹樹四鄰唯見舊孫兒壁間潛認偷光處川上寧忘結網時更見橋邊

記名姓始知題柱免人嗤

全唐詩

盧殷維揚郡西亭贈友人萍颯風池香滿舩楊花漠漠暮春天玉人此日心中事何似乘羊入市年

同上

李紳宿揚州江橫渡濶烟波晚潮過金陵落葉秋嘹唳塞鴻經楚澤淺深紅樹見揚州夜橋燈火連星漢水郭帆檣近斗牛今日市朝風俗變不須開口問迷樓

追昔遊詩

前人入揚州郭詩有序潮水舊通揚州郭內大厯已後潮信不通李頎詩曰鷓鴣山頭片雨晴揚州郭裏暮潮生此可以驗菊芳沙渚殘花少柳過秋風墜葉疏隄繞

門津喧井市路交村陌混樵漁畏衝生客呼童僕欲指
潮痕問里閭非為掩身羞白髮自緣多病喜肩輿同上

前人宿揚州水館舟依淺浦參差合橋映晴虹上下連
輕櫂過時搖水月遠燈晚處隔秋烟却思海峯還悽歎
近涉江濤更慄然閑凭闌干指星漢尙疑軒蓋在樓船

同上

包何同諸公尋李芳直不遇聞說到揚州吹簫憶舊遊
人來都不見莫是上迷樓包刑侍詩集

鮑溶揚州懷古二首柳塘烟起日西斜竹浦風迴雁弄
沙場帝春遊古城在壞宮芳草滿人家龍舟東下事

成空蔓草萋萋滿故宮亡國亡家為顏色露桃猶自恨

春風全唐詩

施肩吾送裴秀才歸淮南怪來頻起詠刀頭楓葉枝邊
一夕秋又向江南別才子却將風景到揚州同上

陸暢贈賀若少府十日廣陵城裏住聽君花下撫金徽
新聲指上懷中紙莫怪潛偷數曲歸同上

姚合揚州春詞三首廣陵寒食天無霧復無烟煖日凝
花柳春風散管絃園林多是宅車馬少於船莫喚遊人

住遊人困不眠滿郭是春光街衢土亦香竹風輕履
寫花露膩衣裳谷鳥鳴還豔山夫到更狂可憐遊賞地

煬帝國傾亡 江北烟光裏淮南勝事多市鄺持燭入
鄰里漾船過有地惟栽竹無家不養鵝春風蕩城郭滿
耳是笙歌 姚秘書集

賈島送沈鶴家楚壻於秦攜妻去養親陸行千里外風
捲一帆新夜泊疏山雨秋吟擣藥輪蕪城登眺作才動
廣陵人 長江詩集

李涉奉使淮南漢使徵兵詔未休兩行旌旆接揚州試
上高樓望春色一年風景盡堪愁 同上

武元衡奉酬淮南中書相公見寄揚州隋故都竹使漢
名儒翊聖恩華異持衡節制殊朝廷連受賑台坐接訐

謨金玉裁王度丹書奉帝俞九重辭象魏千重握兵符
鐵馬秋臨塞虹旌夜渡瀘江長梅笛怨天遠桂輪孤浩
嘆烟霜晚芳期蘭蕙蕪雅言書一札濱海雁東隅歲月
奔波盡音徽霧雨濡蜀江分井絡錦浪入淮湖獨抱相
思恨關山不可踰 臨淮集

裴夷直揚州寄諸子千里隔烟波孤舟宿何處遙思耿
不眠淮南夜風雨 同上

杜牧揚州三首煬帝雷塘上迷藏有舊樓誰家歌水調
明月滿揚州駿馬宜閑出千金好暗遊喧闐醉年少半
脫紫茸裘 秋風放螢苑春草鬪雞臺金絡擎雕去鸞

環拾翠來蜀船紅錦重越橐水沈堆處處皆華表淮王
奈却回 街垂千步柳霞映兩重城天碧臺閣麗風涼
歌管清纖腰間長袖玉佩雜繁纓拖軸誠爲壯豪華不
可名自是荒淫罪何妨作帝京 樊川集

許渾廣陵道中城勢已坡陀城邊東逝波綠桑非苑樹
青草是宮莎山溟牛羊少水寒鳧雁多因高一回首還

詠黍離歌

丁卯集

前人送沈卓少府任江都煬帝都城春水邊笙歌夜上
木蘭船三千宮女自塗地十萬人家如洞天豔豔花枝
官舍晚重重雲影寺牆連少年作尉須兢慎莫向樓前

墜馬鞭

同上

劉得仁送友人下第歸揚州觀省新柳間花垂東西京
路岐園林知自到寢食計相思雨斷淮山出揚帆楚樹
移晨昏心已泰蟬發是回時 全唐詩

薛逢送盧緘歸揚州曾向雷塘寄掩扉荀家燈火有餘
輝關河日暮望空極楊柳渡頭人獨歸隋苑荒臺風裏
裏灞陵殘雨夢依依今年春色還相誤爲我江邊謝釣

磯

同上

趙嘏廣陵苔崔琛棹倚隋家舊苑牆柳金梅雪撲擔香
朱樓映日重重晚碧水含光灩灩長八斗已聞傳姓字

一枝何足計行藏聲名官職應前定且把旌麾入醉鄉

渭南詩集

馬戴廣陵曲葱龍桂樹枝高繁黃金羈葉隱青蛾翠花
飄白玉墀上鳴間關鳥下醉游俠兒煬帝國已破此中
都不知 會進士集

孟遲廣陵城詩紅繞高臺綠繞城城邊春草傍墻生隋
家不向此中盡汴水應無東去聲 全唐詩

劉綺莊揚州送人挂檝木蘭舟楓江竹箭流故人從此
去望遠不勝愁落日低帆影歸風引櫂謳思君折楊柳
淚盡武昌樓 中晚唐詩

方干旅次揚州寓居郝氏園舉目縱然非我有思量似
在故山時鶴盤遠勢投孤嶼蟬曳殘聲過別枝涼月照
牕欹枕倦澄泉遶石泛觴遲青雲未得平行去莫到江
南身旅羈 元英先生集

李頻送友人之揚州一別長安後晨征便信雞河聲入
峽急地勢出關低綠樹叢垓下青蕪潤楚西長安知不
惡隨處得詩題 梨嶽詩集

高駢廣陵宴次戲簡幕賓一曲狂歌酒百分蛾眉畫出
月爭新將軍醉罷無餘事亂把花枝折贈人 全唐詩
張喬寄維揚故人離別河邊縮柳條千山萬水玉人遙

月明記得相尋處城鎖東風十五橋同上

陸龜蒙寄淮南鄭賓書記記室千年翰墨孤惟君才學

似應徐五丁驅得神功盡二酉搜來祕檢疏揚帝帆檣

歸澤國淮王箋奏入班書清詞醉草無因見但釣寒江

半尺鱸松陵集

吳融題揚子津亭揚子江津十四經紀行文字徧長亭

驚人旅髻斬新白無事海門依舊青前路莫知霜凜凜

故鄉何處雁冥冥可憐不識生離者數點漁帆落暮汀

唐英

杜荀鶴送蜀客游維揚見說西川景物繁維揚景物勝

西川青春花柳樹臨水白日綺羅人上船夾岸畫樓難

惜醉數橋明月不教眠送君嬾問君回日才子風流正

少年唐風集

韋莊過揚州當年人未識兵戈處處青樓夜夜過花發

洞中春日永月明衣上好風多淮王去後無雞犬煬帝

歸來葬綺羅二十四橋空寂寂綠楊摧折舊官河浣花集

前人江亭酒醒却寄維揚餞客別筵人散酒初醒江步

黃昏雨雪零滿坐綺羅皆不見覺來紅燭背銀屏同上

張蠙贈江都鄭明府他人豈是稱才術才術須觀力有

餘兵後幾年臨劇邑公清終日是閑居牀前怪石神仙

畫篋裏華牋將相書更欲棲踪進彭澤香爐峯下結茆廬

全唐詩

李洞送韋太尉自坤維除廣陵全蜀拜揚州征東輟武侯直來萬里月旁到五峯秋幢冷遮高雪旗閑卓亂流謝朝明主喜登省舊寮愁隔海城通泊連河市嚮樓干官倚元老虛夢法雲遊

才江詩集

徐凝晚憶揚州蕭娘臉薄難勝淚桃葉眉長易得愁天下三分明月夜二分無賴是揚州

全唐詩

羅隱重九日廣陵道中秋山抱病何處登前時韋曲今廣陵廣陵大醉不解悶韋曲舊遊堪拊膺佳節縱饒隨

分過流年無奈得人憎却驅羸馬向前去牢落路岐非

所能

甲乙集

李中廣陵寒食夜廣陵寒食夜豪貴足佳期紫陌人歸後紅樓月上時綺羅香未歇絲竹韻猶遲明日踏青輿

輸他輕薄兒

碧雲集

徐鉉寄江都路員外吾兄失意在東都聞說襟懷任所如已縱乖慵爲傲吏有何關鍵制豪胥縣齋曉閉多移病南畝秋荒憶遂初知道故人相憶否嵇康不得嬾修書

徐騎省集

前人贈維揚故人東京少長認維桑書劍誰教入帝鄉

藝文

藝文

藝文

一事無成空放逐故人相見重淒涼樓臺寂寞官河晚
人物稀疏驛路長莫怪臨風惆悵久十年春色憶維揚

徐騎省集

前人月真歌揚州勝地多麗人其間麗者名月真月真
初年十四五能彈琵琶善歌舞風前弱柳一枝春花裏
嬌鶯百般語揚州帝京多名賢其間賢者殷德川德川
初秉綸闈筆職近名高常罕出花前月下或游從一見
月真如舊識閑庭深院資賢宅宅門嚴峻無凡客垂簾
偶坐唯月真調弄琵琶郎為拍殷郎一日過江去鏡中
嬾作孤鸞舞朝雲暮雨鎮相隨石頭城下還相遇二月

三月江南春滿城濛濛起香塵隔牆試聽歌一曲乃是
資賢宅裏人綠牕繡幌天將曉殘燭依依香裊裊離腸
却恨若多情輭障薰籠空悄悄殷郎去冬入翰林九霄
官署轉深沉人間想望不可見唯向月真存舊心我慙
闌茸何為者長感餘光每相假陋巷蕭條正掩扉相攜
訪我衡茅下我本山人愚且貞歌筵歌席常無情自從
一見月真後至今贏得顛狂名殷郎月真聽我語少壯
光陰能幾許良辰美景數追隨莫教長說相思苦
同上
閨秀李季蘭留別廣陵故人無才多病分龍鐘不料虛
名達九重仰愧彈冠上華髮多慚拂鏡理衰容
吟隱襍錄

釋皎然春日送潘述之揚州別渚望邗城岐路春日徧
柔風吹楊柳芳景流郊甸日日東林期今夕異鄉縣文
房曠佳士禪室阻清盼離恨奪賞心不得諧所願莫憶
山中人碧雲遙可見 宏秀集

前人送契上人遊揚州西陵古江口遠見東揚州淥水
不同泛春山應獨遊尋僧白巖寺望月謝家樓宿昔心
期在人寰非久留 同上

前人送僧遊揚州平明環錫向風輕正及隋隄柳色行
知爾禪心還似我故宮春色肯傷情 同上
方壺居士隋隄詩嘗憶江都大業秋曾隨鸞蹕戲龍舟

傷心一覺興亡夢隄柳無情識世愁 全唐詩

廣陵道士戲吟無事到揚州相攜上酒樓藥囊爲贈別
千載更何求 全唐詩

宋王禹偁揚州寒食贈屯田張員外成均吳博士同年
殿省柳丞前年寒食節待詔直內庭休暇百官出獨掩
深嚴局近侍不敢醉賜酒空滿瓶問就通中枕時聞索
上鈴思入無何鄉兀然欲忘形去年寒食日滌上忝專
城山歌喧里巷春物媚池亭永陽溪水綠琅玕山色青
謫宦自消遣不敢誇獨醒往往取宮醞時時對花傾醉
來念身世翻使泪縱橫今年蒞淮海時節又清明堆案

增修七身集 卷二十一
有留事聽歌無歡聲胥徒費簿領使客煩送迎控牢未
空歇堰埭勞修營衰病力不支懶慢性已成虛花滿雙
目數髮添幾莖酒銷畧無味伎樂固難聽誰言寒食下
終日取茶烹屯田布素交屈此關市征昔年同應舉典
衣飛巨觥博士東觀客求官得步兵況且丹陛前同爲
出谷鸞殿丞尹我邑桑梓復弟兄吏隱長嵯茗終朝看
道經三賢宴會少七夕什假并何不策我馬廢苑尋放
螢何不蕩我舟樓臺訪摘星三春景欲盡九曲波始平
居然偏吏役頓此阻交情老態厭春乖病身憂宿醒如
水若不改籍糟亦胡啗解印蓄素志吟詩露丹誠維揚

非所愛有便卽歸畊

王黃州小畜集

前人還揚州許書記家集

許渾孫進家集得官

君不見近代詩家

流胡爲蹇滯多窮愁孟郊憔悴死逆旅浪仙斥逐長江
頭張生漂泊冬瓜堰徒云輕薄萬戶侯浩然無成鹿門去
李洞慟哭昭陵休生無風教興王化死無勳爵貽孫謀
可憐詩道日已替風騷委地何人收高陽許公通六義
獨向聖朝生後嗣因將先集進九重高步金臺曳珠履
祖德光輝聖主知府尹賢明丞相子
時維揚權牧卽故甲令薛相之子
廣陵郡大古九州記室官清外三字遂令天下學詩人
健羨君家窮四始我來近侍遊江都玳瑁往往陪歡娛

遂求家集恣吟諷海浪乾處堆珊瑚因思賈孟數家一
何苦詩思嗷嗷餒無主子孫淪沒誰及君閒倚紅蓮傾
綠醕草榭餘閑好賦詩莫放風情忝爾祖

同上

韓琦廣陵大雪淮南常歲冬猶燠今年陰沴何嚴酷黑
雲漫天一月昏大雪飛揚平壓屋風力軒號助其勢擺
撼琳琅摧凍木通宵徹晝不暫停堆積樓臺滿溪谷有
時造出可憐態淋漓幾縈寒霰不成絲驟集疏簷還掛瀑蟄
蛙得意欲跳擲幽鷺無情成挫辱鱗魚江叟冰透蓑賣
炭老翁泥沒輻閭閻細民誠可哀三市不喧遊手束牛

衣破解突無烟餓犬聲微饑子哭我聞上天生時澤亦
有常數滋農穀膏潤均於一歲中是謂年豐調玉燭此
來盛冬過爾多却慮麥秋欠霑足太守憂民仰天祝願
噓氛霾看晴旭望晴不晴無奈何擁被醉眠頭更縮

安陽

司馬光寄揚州侯都監仲倫木落淮南樹秋風日夜高
月臨揚子渡雪捲廣陵濤不得同蕭散何因破鬱陶空
憑尺書達未解夢魂勞

司馬溫公傳家集

前人送楊秘丞秉通判揚州苦聞小杜說揚都當昔豪
華今在無江勢橫來控南楚地形前下瞰東吳萬商落

日船交尾一市春風酒并壚得意莫忘京國友
蹋塵衝雪奉朝趨

同上

梅堯臣寄維揚許待制當年永叔在揚州中秋待月後
池頭約公準擬與我敵是夜二雄張利矛我時小却避
其銳風愁雨阻姮娥羞主人持贈紫石瓶上有朏魄桂
樹婆娑而枝虬作詩誇詫疑天公愛惜光彩向此收
坐稽顙歎辨敏文字嚮亮如清球更後數日我北去相
與送別城門樓誰知康成能飲酒一飲三百杯不休雞
鳴各自便分散山光寺側停畫舟我來謁公公未起臥
索大白須扶頭而今倏然已八載公領府事吾居憂歐

陽始是玉堂客批章草詔傳星流問公可憶羊叔子雖
在軍中常緩帶而輕裘寄聲千里能信不

宛陵集

前人雜言送當時待制知揚州廣陵老人爭持壺酒朝
言送少年使君暮言迎少年太守少年俱是玉墀人文
章快利生銅吼莫作蕪城賦事往復何有莫聽嵇康琴
商聲豈能久今當太平非不偶星宿煌煌羅北斗揚州
古富變荒涼萬俗一心依父母地包淮海江湖寬貨走
荆吳楚越厚開釀封羊願遇賓天下沄沄不輕口
孔武仲大業二絕西苑池塘涸海流君王千騎月中遊
娥眉排戶爭新寵不道迷樓自有樓
杳杳揚州只隔

淮龍舟彩舸映天來春風咫尺伊川路不放君王殿脚
回清江文集

孔平仲發穀熟縣寄揚州同寮清晨出古縣獨遇賣花
翁芍藥開無數瓊花出漸紅皎如情人來梳洗朱簾半
掩嬌春風去年維揚陪勝賞此花開謝旬月中名園勝
刹處處有深畦淺壟無西東品流已多搜絕異若數英
俊遺凡庸邇年新花更奇巧造化彫琢何時窮離家今
日已千里雲雨浩蕩迷淮東而今又及賞花月因循不
賞花更空寄語維揚好相識花時勉泛黃金鍾三孔先
生集
劉敞雷陂勸耕禱言並敘此陂蓋江都宮之地吳王鈞

臺在其旁先時民耕三十家其中後疆爲吏所奪廢不
耕者十餘年矣予按地籍悉召還耕者使縣大夫授之
地如其舊詩曰君不見江都宮昔時何崔嵬下臨雷陂
水前踞吳王臺臺傾無餘級水竭空塵埃隋人已曾顧
此長歎息今世更爲隋人哀乃知天地間一盛亦一衰
但從伏羲以來三十餘萬歲未有書契勝言哉堯桀是
非可兩忘我欲勸人闢草萊種稻水一方藝麻蒔四頽
爽鳩之樂我非有聊以玩此猶莓苔未知百年間更復
誰當來且欲及閑從賓客省畊仿斂時徘徊公是先生
集
王安石荅揚州劉原父少食苦不足一官聊自謀爲生

增修古身集 卷二十一
晚更拙懷祿尙遲留黽勉詎有補強顏包眾羞謂我古
人風知君以相優君實高世才主恩正綢繆苟矣哀此
民華簪寧揚投 荆公文集

王安國送馬子山給事赴揚州都人供帳國門東淮海
兵符節制中青瑣論思虛夜月朱轡游衍值秋風侯嗟
誰在思張仲民喜重臨得次公內外忘懷能自適何時
談笑一樽同 王校理集

蘇軾送杜介歸揚州再入都門何事空閒看清洛漾春
風當年帷幄幾人在回首觚稜一夢中採藥會須逢薊
子問禪何處識龐翁歸來鄰里應迎笑新長淮南舊桂

叢 東坡詩集

前人次韻王定國倅揚州此身江海寄天游一落紅塵
不易收未許相如還蜀道空教何遜在揚州又驚白酒
催黃菊尙喜朱顏映黑頭火急著書千古事虞卿應未
厭窮愁 同上

蘇轍送杜介歸揚州揚州繁麗非前世城郭蕭條却古
風尙有花畦春雨後不妨水調月明中東都甲第非嫌
汝北牖羲皇自屬翁渭洛放船經月事急先鷓鴣達芳
叢 樂城集

張蘊維揚卽事牛斗星邊禹貢州東南屏蔽大江流向

來明月珠簾夢不信秋風夜柝愁 斗野友稿

王令登郡樓江城朝雨濕晴烟樓上風帆送去船苟得
息肩閑歲月時來開口笑山川田園啼鳥三春日江海
扁舟萬里天何計脫身來此老青山白髮兩忘年 廣陵詩鈔
蘇頌元祐癸酉秋九月蒙恩補郡維揚十一月到治首
閱題名前後帥守莫匪一時之豪傑固所欽慕矣然於
其間九公頌有寅緣感舊思賢嗟嘆不足因作長韻題
於齋壁詩曰維揚禹九州淮南唐四鎮地據江海衝星
占吳楚分五季劇荒擾我朝□□督府時稱雄守帥
選常遴由來竹符使莫匪邦家聞其間九賢老尤推萬

人俊太原文章伯師友淵源濬五事陳便宜七制推典

訓屢薦官雖崇三已色無愠 王元岐公老藩臣惠愛浹

吳晉薦士言有味偃兵不在陳鼎任方燮和丘園終委

順 杜岐公 淵哉文肅公生邁休明運三朝翰墨工二府謀

猷盛道倦任推遷名全篋緇憐 盛公 鄭公梁棟才天質

琳球韻大筆弟兄同萬事朝廷問迴翔極宰樞終始無

疵吝 宋公 仁宗初倦勤魏公復來觀堂堂真相尊譽譽

嘉言進十字篆勛勞大書報忠蓋 韓公 樂安子舊館早

歲窺牆仞儒林仰宗工政府登閣論雖無鼎銘勳頗有

書傳信 歐公 吾友□□□利器發劘刃論經鄙章句縱

辯摧凌誅

音訊

經緯風志違風流壯年盡

劉侍讀

文武惟秀

公將相紆雙印入撫復出藩撫淮兼帥濶憶昔獲攀稽

後來嘗慕蘭

陳公

司空一代宗累葉清風振繼父漢章

平致君古堯舜時歎人云亡上嗟天不愁

呂公

後人企

前修景行仰高峻聲氣或相同古遠視猶近馬遷稱晏

嬰羊祜交陸遜異代思執鞭仇隣通餽餽粵予望諸賢

先後來茲肥既非鎮俗才仍抱終天覺

先公崇領是州辭不赴

砂

礫自澄汰鉛鎔殊利鈍將書名在石終慚駑附駿前人

固難追功德猶可詢鞭後志良勤思齊言亦切顧章口

在懷年侵霜滿髻俯仰復奚爲茲焉俟嘉遁

寶晉英光集

米芾揚州作春風何索莫帶雪入揚州尙想遺釵集曾

觀上玉鈎眞同一夢覺坐憶十年遊邂逅逢孫楚酣歌

慰滯留

寶晉英光集

黃庭堅次韻寄藍六在廣陵聖學相期滄海頭當時各

憶富春秋班揚文字初無意滕薛功名自不優焦尾朱

絃非眾聽南山白日使人愁傳聲爲向揚州問相憶猶

能把酒不

黃山谷集

前人廣陵早春春風十里珠簾捲彷彿三生杜牧之紅

芍稍頭初蠶粟揚州風物髻成絲

同上

晁補之揚州被詔著作佐郎自金山回阻冰效退之陸

渾山火句法二年官揚猶一炊丞聾母害守不譏帝知
無功呼返之具舟從江民不知道旁愚叟為涕洟豈無
愛人如爾為我謝叟歸視汝兒風號鴻潦水涸陂冰塞
川船不可移白蜺橫野光透迤寒威上射小日規旦行
一里日午維十日繫野兒啼饑中無載盜過不窺官令
十夫為操椎耶許相力哀復疲我笑遺夫是安施霜不
殺草聖所歎歲十一月冰固宜逆天進亦不可幾為兒
博節兒安嬉窻口月暖由流澌雞肋集

前人赴廣陵三首醉臥符離太守亭別都絃筦記曾稱
淮山楊柳春千里尙有多情憶小勝南都劉守司雙鬢
勸酒小勝其字也

急鼓鼙下泗州却瞻金塔在中流帆開朝日初生
渡船轉春山欲盡頭 楊柳青青欲哺鳥一春風雨映
隋渠落帆未覺揚州遠已喜淮陰見白魚同上

鄒浩送俞秀老歸維揚踏雪驅驅原憲履御風獵獵老
萊衣情投豈比鍾山出興盡還同剡水歸煬帝池邊松
蔭遠維摩室內燭光微攜節促席徜徉處應記口年接
下機道鄉集

秦觀還自廣陵四首薄茶便當烏陳酒短艇聊充下澤
車墳墓去家無百里往來仍不廢觀書 南北悠悠三
十年謝公遺堞故依然欲論舊事無人共臥聽鐘魚古

寺邊 邗溝繚繞上雲空坐阻層冰不得通賴有東風
可人意爲開明鏡玉奩中 天寒水鳥自相依十百爲
羣嬉落暉過盡行人都不起忽聞水響一齊飛 淮海集
晁說之揚州三絕句客散平山堂上後孰如子駿在揚
州解傳鮑照辭歲舊輸盡蕪城千古愁 風常歡喜月
常愁愁有盈虧喜自由客到揚州已迷路不須特地上
迷樓 便風五兩更幽悠回望鄉閭烟霧浮若問無情
唯潁水不來隨我到揚州 景迂生文集
前人淮海二絕卜錢簇簇怯單單小婦揚州橋上看拜
鬼求神應更恨不堪春雨作花寒 莫問揚州桃葉生

渡江今日得風情長沙子弟更相笑上到隋隄便住營

同上

曾肇淮南道中四山蒼鬱氣朝隋晚雨廉纖未有泥鴨
綠幾甸塘水浸鵝黃一段柳秧齊幽花布地金錢小野
夢縈林翠幄低滿目淮南風景好不堪時聽子規啼 曾文

昭公遺錄

謝邁送王坦夫由淮南入京王郎乘輿上扁舟數遣書
來寫我憂奏牘三千待金馬捲簾十里夢揚州桃花水
漲理歸櫂蓮葉杯香消客愁白髮倚門長望子細君應
賦大刀頭 考槃集

沈邁自揚州與中甫才翁偕行相過得所好相從如所
期平生慕朋友形跡無牽羈道路遠千里冬春踰再時
要將窮吾樂勿厭行遲遲

西溪文集

李之儀維揚會張曼老陳瑩中分得柳字我生故有地
物物皆可口身行半天下薦飽無不有讀書恨未博每
索多掣肘一逢可意人似對靈和柳老來益落莫永日
類中酒北舟得一妙洗盡平身垢參軍□□□記室寒
掛斗雍容送落日百納爲斗藪崎嶇等外驚撇眼自妍
醜真樂極胡越詎可論不朽昔人固欣慕僅欲操箕箒
堂墮幾千仞未易窺戶牖逡巡卽千里轉盼百年久一

笑且低回朱顏今皎首

姑溪集

蔡襄廣陵廣陵歸客嘆飛蓬懷古傷離向此中前世翻
波那復問十年彈鋏已成空樓頭畫角催殘日城上寒
鴉噪晚風井徑蕭條人不見又隨潮信渡江東

蔡忠惠集

前人宿揚州瓜洲堰埭阻行橈更待江頭後信潮獨背
殘燈數歸路風傳寒柝夜迢迢

同上

呂本中揚州贈一上人日日東風吹客衣小園春在掩
芳菲殘花過雨飄零盡好鳥穿林自在飛往事虛成采
蕨瘦故人貧有食言肥知公未有西行晚且伴江船緩

緩歸

東萊文集

前人廣陵道中寒食二首風雨屬連春事休碧鱗三尺
薦行舟短牆不見桃花面付與長流自在流 南來消
息不真傳政恐相逢却未然何處青帘足沽酒粥香餲
白是今年 同上

楊傑贈馮揚州天下無雙士淮南第一州文章老元帥
節義古諸侯路穩歸黃閣功成建碧油九重至堯舜四
海望伊周楚甸共吟筆吳兵賴坐籌風雲生鷁首蛟蜃
怯龍頭有士依餘芘干時媿拙謀滄溟波浪險願借釣
鼈鈎 無爲集

賀鑄九日寄維揚劉明中揚船瓜步背瓜洲底處孤亭

是玉鈎蠟燭有心啼別夜布帆無恙到南州黃花佳節
與何事白髮故人分取愁賴有滄江知客恨長年西北
望京流 廣陵後集遺補

前人揚州敘遊迷藏九曲屬樵畊野草閑花故有情廢
苑春風劇如許隔江山色可憐生新聲度曲復誰道古
井酌泉聊獨傾杜紫薇靈定相笑青樓薄倖不知名 同上
楊萬里晚泊揚州楊子橋西轉彩航粉城如練是維揚
百年舊說兵戈後近歲新聞草木荒杰閣高臺雲夢出
野梅官柳雪中香使君領客周遭看走馬歸船欲夕陽

楊誠齋集

前人夜過揚州祇今何許問迷樓更有垂楊記御溝除却瓊花與紅藥揚州不是古揚州 同上

陸務觀送七兄揚州帥幕初報邊烽照石頭旋開胡馬集瓜洲諸公誰聽芻蕘策吾輩空懷吠畝憂急雪打牕心共碎危樓望遠涕俱流豈知今日淮南路亂絮飛花

送客舟

劍南詩集

嚴羽和上官偉長蕪城晚眺平蕪古跡暮蕭條歸思憑高黯未消京口寒烟鴉外滅歷陽秋色雁邊遙晴江木落長疑雨暗浦風多欲上潮此夕悵惆頻極目江南江北路迢迢

戴復古揚州郡齋話別致謝如公當向古人求識面何須萬戶侯浪說釣鰲游瀚海真成騎鶴上揚州受恩多處難為別宿酒醒時始覺愁回首平山堂下路不堪風雨送歸舟 石屏詩

周必大送鄭漕口移帥揚州聞道維揚地望雄風流人物已江東六龍前日臨淮海五馬由來說醉翁璧月幾橋雷夜色珠簾十里待春風遙知九日平山會笑插茱萸滿鬢紅 省齋文集

劉宰北固望揚州懷古北固城高萬象秋烟竿一縷認揚州試乘綠漲三篙水要見朱簾十里樓淚濕宮衣朝

霧重愁熏寒草夕陽浮隋隄舊事無人問兩兩垂楊繫
客舟

漫塘集

李彌遜宿揚州城外舟行遠城郭缺月疏林杪窈窕一
溪深微茫眾星小忘言對詩書適意觀魚鳥幸此絕紛
華行歌閱昏曉

竹溪集

前人廣陵道中禁路追隨又兩年長竿那可使魚緣壯
心未展傷遲暮捷徑無工較後先軟飽三杯當去客橫
蒲十幅得風船眼中有句無人道誰與收歸古錦編
丁木次揚州何安節撫機韻送別邗江路梅花作暮愁
關情何水部回首古揚州雁影明寒水冰澌澁去舟想

應今夜宿霜月滿瓜洲

詩家鼎鑪

丁開揚州歲暮萬國回春日層城晚眺餘江聲隔吳楚
原色到邳徐大閱軍容壯狂歌客思疏百年寒荻裏風
雨憶吾廬

谷音

王巖叟揚州感舊懷古隱隱蕪城枕碧流繁華曾是帝
王州一聲水調滿明月十里春風半畫樓白鳥不離圖
上去江雲長在鑑中浮廢興屈指千年事何異行人寄
博遊

大名集

朱繼芳揚州金陵王氣水東流到淮南古渡頭夜半
一聲天上曲錦帆天子下揚州

靜佳乙稿

吳龍翰春夜隔江望揚州烟抹蕪城熨不開夜深燈火
見樓臺欲披紫綺過江去月冷滄洲待鶴來

古梅遺稿

羅公升揚州瓊姬羽化歸天去花后香銷埽地空要覓

揚州舊風物夕陽禪智立秋風

滄洲詩集

潘希白送蔣朴之維揚隋家天子愛揚州四十離宮取

次遊荆棘久迷秦隴路柳絲空拂汴河流君才清似庾

開府世事難於孫仲謀莫謂青山怯騎馬却將風景付

閑愁

東甌侍集

宋伯仁離揚州不爲鱸魚憶故鄉只緣心事近重陽髩

絲添得三分白空被黃花笑一場

西陸集

楊冠上揚州太守古人肉食無遠謀腰錢騎鶴向揚州

春風十里珠簾捲但看竹西歌吹樓天朝遷用詩書帥

上策公言須自治屏翰堅持保障功江淮益壯金湯勢

北騎不敢縱南牧關塞烟迷芳草綠健兒歌舞樂昇平

一曲梅花細柳營

嘉靖維揚志

李曾伯送揚州胡倅赴堂召擊楫因呼渡勤公佐此州

邊防新績用湖學舊源流未了平戎檄還催向闕舟君

王方側席檣燕勿遲留

里社久相於深知我計疏壯

懷方磊磊別語又渠渠竟日猶傳箭何時可荷鉏煩君

看三徑松與菊何如

李可齋稊稿

方岳書維揚張君梅卷平生何遜揚州夢到得揚州月
自寒誰遣雪篷春半樹詩情更作故人看 月明臨得
霜橋影只恁橫斜自一奇喚起江南歸夢遠竹村烟水
有茅茨 秋崖集

文天祥維揚驛三年別淮水一夕宿揚州南極山川古
北風江海秋昭君愁出塞王粲怕登樓千載英雄淚如
今況楚囚 指南錄

前人至揚州北廟何神三十郎問郎行客忒郎當荒堦
枕藉無人問風露滿堂清夜長 樵夫偏愛客途長肯
向城中爲裏糧曉指高沙移處泊司徒廟下賈家莊 文信

公集

謝翱上親征李重進至廣陵臨其城拔之爲上臨墉歌
上臨墉戈耀日韎韋指顧流霞疾臯止其魁不及卒其
魁則頑曰予馘自出坐于轅門斧以率歸子往諭泣股
栗語中其肝至畢述侍不及屏沮回遙鞠投於燎甘所
卽皇仁閔下焉止蹕貔貅撤竈歸數實獲其棘矢納世
室 晞髮集

汪元亮揚州作江都王氣逐浮漚舊說維揚第一州銀
燭夜攢喧鳳吹金鞍曉織衛龍舟綠蕪城上軍聲合紅
藥堦前客淚收雲散月明天在水誤疑身世落瀛洲 湖山

增修身集志 卷二十一 詩
類集

前人過揚州作重到揚州十載餘畫橋雨過月模糊后
皇廟裏花何在煬帝隄邊柳亦枯陂麥青青嘶亂馬城
蕪冉冉落羣鳥人生聚散愁無盡且小停鞭向酒罈同上
閨秀杜氏婦北行詩江淮幼女別鄉閭亦似昭君遠嫁
胡默默一身歸故國區區千里逐狂夫慵拈簫管吹羌
曲嬾寄羅裙舞鷓鴣多少眼前悲泣事不如花柳舊江
都 詩話類集
釋參寥廣陵城外野步呈萃老林稍聒聒鳥聲繁積雪
初消澗水渾老樹臥波寒影動野烟浮草夕陽昏風回

笛響山前路犬吠人行竹外村杖履不知幽興遠歸來

新月在柴門 參寥集

前人維揚秋日西郊二首雨洗高梧爽氣浮鳴蟬相喚
作新秋翻空白鳥一行去目送岡巒欲盡頭 瓜花零

落豆花繁秋入隋家舊苑看水調遺音今寂寞空餘壞

道瀉哀湍 同上

德洪與蔡揚州五馬東來數月間十州人物帖然安池

邊芳草新吟罷樓外遙山晝臥看鈴閣蠟烟秋色晚譙

門銅漏夜深寒雖然自是雲林客猶把風流作話端 石

門文字禪

正宗江都燕蕪城春色裏花濺泪潺湲社燕歸無屋營
巢寄客船 宋高僧詩選續集

金王渥被檄再至揚州制司驛亭有題詩譏予和事不
成者云來往二年無一事青山也解笑行人因爲解嘲
二年奔走道途間知被青山笑往還只向江南南岸老
行人應更笑青山 全金集

元郝經伴使秦文舉欲入維揚故賦詩以見意東風吹
落瓊花雨南浦潛生荔子烟夜久有懷聞獨鶴春歸無
語怨啼鶻天沉海底涵金鎖日隱鼇頭頓玉鞭千尺絲
綸萬年井文園消渴竟誰憐 郝文忠凌川集

尹廷高維揚懷古漣漪四面遶蕪城蕩盡當年殺氣羸
電掃霆奔餘百戰河清海晏際千齡天開西北方輿大
山在東南半角青可是杜郎無感慨只吟荳蔻賞娉婷

玉井
樵唱

王惲揚州送劉漢卿東歸汴梁海鷗翻雲下錦鞬眼中
人物見風流誰期淇水三秋別却作維揚數日留樽俎
流連江上月風烟吟眺竹西樓馬頭細嚼梅花句又領
春風入汴洲 秋間文集

程鉅夫送月浦鄭貴道教授揚州眾芳搖落士林嗟喜
見先生兩鬢華問道曾爲諸老客亢宗原是廣文家典

刑四柏亭前樹聲譽繁禧觀裏花玉署卽今重人物冷
官何得久天涯

雪樓集

吳澄荅揚州盛子淵多情示我四感興久別喜君參悟
眞視聽兩忘尤貴默貪痴淨掃莫留嗔已知身外總長
物且得家中有至珍處處揚州好風景瓊花常占十分

春

吳文正公集

袁桷過揚州憶昔四首漢東之國古隨州一老昂藏死
卽休黑髮虎頭眞骨相青氈塵尾舊風流人言謝傅爲
朝鎮誰信鍾儀作楚囚浩蕩乾坤納今古好將汗簡瀉
千秋空遺蒸壤白如銀不見當年指畫因高視漢庭

無出右清談洛學竟成真極知羽扇爲痴具更恨烏衣
是偶人六合車書端有意百年荆棘已生春蕭蕭凍
雨濕旌旄猶著殷紅舊戰袍金盃昔聞歸馬埒牙牌誰
肯信龍韜樓頭換箭鼓聲急堂上傳杯歌韻高到底奸
雄有眞態木棉菴內鬼車號四城賦擬張衡麗十鑑
書同賈誼哀腹裏春秋納雲夢案頭今古起風雷青山
不受折腰辱白眼豈知徒步回舟泊城南更回首寒風
吹泪下天台

清容居士集

馬伯庸送客歸揚州楊子江頭水拍天人家種柳住江
邊吳娃蕩槳潮生浦楚客吹簫月滿船錦纜憶曾遊此

地瓊花開不似當年竹西池館多紅藥日日題詩舞袖前

石田集

貢奎揚州贈功遠青山遶屋竹當門四月江南煮酒尊

日暮偏舟呼不住一溪新雨水初渾貢文靖公集

楊載寄維揚賈侯經國長才世豈多羣邪嫉正奈公何

氣蒸雲霧藏喬嶽聲轉滄溟放大河遠跡江湖猶棄絕

驚心歲月屬消磨鷗鵬自有垂天翼肯逐飛鴻入網羅

楊仲宏集

范梈離揚州孤篷如磨遶汀沙葉滿平湖藕未花回首

竹西亭漸遠一江烟雨酒旗斜德機集

揭傒斯送人之淮東扁舟何處地此地飽經過彭蠡江

聲合揚州月色多天低知近海地濶欲橫河自是吾生

拙如君定若何秋宜集

黃潛送揚州傅學正全淮控制列城遙尙想青春虎豹

韜一日江山走珠玉萬方燈火沸笙簫喜逢才俊登文

署好頌升平荅聖朝芍藥瓊花兒女事可緣風月逗華

鑣黃學士文集

柳貫曉次揚州阻風不得渡江訪傅子立留飲迨暮明

日小至揚州城邑曙烟中一幅征帆趁遠鴻地坼江傾

將至海日南景夕故多風歸期將與寒梅近生意纔看

茂草同輪寫交情添耳熱醉鄉誰謂酒無功柳待制文集

薩天錫送吳寅甫之揚州青楊吹白花銀魚跳碧藻落

日上江船二月淮南道渺渺春水涯悠悠雲樹杪安得

快并刀江頭剪芳草天錫雁門集

前人送僉事王君實之淮東使君臘月揚州去東閣梅

開雪亞枝淮上有官皆避馬竹西無處不題詩春風楊

柳平山路夜月瓊花后土祠從此公餘多勝覽好傳佳

句遠人知同上

前人題揚州驛秋風江上芙蓉老階下數枝黃菊鮮落

葉正飛楊子渡行人又上廣陵船寒砧萬戶月如水老

雁一聲霜滿天自笑棲遲淮海客十年心事一燈前同上

宋无揚州卽事玉壘開方面金湯控上遊連營驃騎宅

重橋雁行樓彊努虚空發飛橋日夜浮烟生烽燧地草

死虎狼秋此處兵威震當時國步憂六年襄郡守三策

蓋臣謀大將深圍限長江萬里休兩淮先按堵孤注獨

橫籌破竹纔成勢聞風已置郵乾坤機軸轉海岳版圖

收春變山堂柳波通汴水漚平坡南下馬遠渡北來舟

無復瓊花夢猶餘芍藥愁塵埃何監子還擁黑貂裘子虛

陳旅用吳彥暉韻送揚州張教授還汴梁花鞭細馬踏

輕塵柳外移舟水滿津莫向春風動歸興杭人半是汴
京人 匆匆歸去緣何事要看揚州芍藥花定有金盤
承絳露送他梁苑故人家 安雅堂集

貢師泰揚州別韓克莊僉憲紅日東生綠霧收海風吹
客到揚州露分仙掌金盤冷香動瓊花玉樹秋使者乘
驄開大府仙人騎鶴醉高樓朝來別我垂楊岸珂佩如
雲簇水頭 玩齋集

邊賢送王公子歸揚州玉雪王公子歸鞚向竹西水清
淮白上天濶海青低瓊樹春前發烏絲醉後題何須問
勲業名與爾翁齊 金臺集

前人寄揚州成元璋先生先生白髮好樓居抱膝長吟
樂有餘睡起茶烟浮几席春深竹色上圖書無因東閣
論封事有約南山共給廬千里停雲勞夢想人來應望
致雙魚 同上

張翥中秋廣陵對月散盡浮雲水在東白蕉衫冷小庭
空星河夜影樽罍裏城郭秋聲鼓角中落葉有光時墜
露鳴蛩無響不含風此生五十三回見只遣姮娥笑秃
翁 峴菴詩集

前人送王季境還揚州兼述所懷遠憶江南后土祠君
歸今已發瓊枝好尋月下吹簫處猶及花前把酒時錦

增修甘泉縣志 卷二十一 藝文 頁
瑟金錢餘舊伴烏絲紅袖有新詩故人相見如相問老
盡當年杜牧之 同上

杜木送趙伯常歸揚州往年初記抵京師正類機雲入
洛時未說鰲頭分赤管先傳馬首控青絲瓊樓舊醉家
家酒金剗新題處處詩此日揚州歸去路錦衣光彩照

城池

清江碧峯集

李存贈別楊秀才赴真揚二州打捕提舉司都目錦江
重會各蒼然別夢驚回二十年虞府已需君入幕詩壇
猶笑我無瓊瓊花月冷看騎鶴玉盃春香取獻狂此去
帆檣千里近封書得到故人邊 李侯庵文集

陳高歲首自廣陵入高郵舟中作北風吹湖水遠行當
歲徂孤舟無同人相依唯僕夫遙睇高郵城彷彿十里
餘落日去地遠飛雁與雲俱悠悠思故鄉邈在天南隅
慈親倚門望我身猶道途羈旅豈足恤但念骨肉疏何
當脫行路歸臥山中廬 不繫漁舟集

吳師道揚州作畫鼓清簫估客舟朱竿翠幕酒家樓城
西高屋如鱗起依舊淮南第一州 吳禮部集

余闕揚州客舍船頭澆酒祀神龍手握金錢擲水中百
尺樓船雙夾櫓唱歌齊上呂梁洪 青陽集

成廷珪送解伯中赴史館召至正癸未朝廷以文事遣

使起河東張先生於廣陵明年史局開又於廣陵徵解
先生廣陵連有二事觀茲榮美賦詩為別海嶽沉清又
百年前朝陳跡散雲烟恭聞天上修三史連向淮南起
二賢青簡旁搜成大典黃封迭出邁遺編先生善用春
秋法豈下當時太史遷

居竹集

何中維揚道中淮天如水水如秋葉葉漁郎下釣舟北

畔荷花南畔柳殷勤送我到揚州

知非堂集

劉秩過揚州廣陵不見舊風烟楚客登臨思惘然水落
魚蝦常滿市湖多菱芡不論錢干戈滿地懷今日歌舞
連天記昔年獨有長橋秋夜月照人猶自弄嬋娟

元詩選

張伯淳送元美維揚省覲輕航一葦即家庭肯教尋常
兒女情相見便須談實用此行不是為虛名關心淮水
雲逾白回首西湖水自清我有欲言言不盡倚樓時數
往來程

張養蒙先生文集

王安中遊廣陵海門潮落見瓜洲雲樹蒼茫馬上遊千
里河山歸禹貢百重烟水入淮流蕪城積夢瓊花月隋
苑傷心碧草秋二十四橋人靜夜為誰猶憶木蘭舟

草澤

狂歌

元口口已丑秋揚州懷古閑登此地憶迷樓昔日朱甍
今土邱古澗尚存獅子口荒池常得鳳釵頭笙簫遠逐

秋風去歌舞人隨薤露休千里汴隄連塞草錦帆不復
挂龍舟 元水鏡集

李質過揚州三十年前記此過皆春樓下駐行窩十千
一斗金盤露二八雙鬟玉樹歌自昔瓊花祠后土至今

荆棘臥銅駝江都門外王孫草怨入東風綠更多 蓉塘詩話

馬玉麟揚州作家住洞庭湖水頭幾回夢裏在揚州玉

簫吹徹瓊花月十二珠簾總下鉤 東阜集

劉說送忻都總管愛第五子歸揚州沙公昔乘太守車
金帶十圍長髯鬚邦民感恩若父母出入爭看填街衢
大兒相繼分半符春風甘棠到處無十年父兄不可見

見君風致猶相如身當世賞讓其季直以此意為父娛

江南魚筍江北酥斑衣捧觴繡繞輿自言孝友有至樂

金章紫綬非所須為兄雪冤北燕關為兄收骨南海隅

急難懷死志鍊石塞風障雨埃滿膚韓穆愛弟推厚爵

潘郎奉母誇閑居退之念兄如念父濤瀧萬里攜接孤

世言古人不再得古人今人還少徒清時卓行須論薦

明當整翮千華殿山中酒香催別帆五月南方浪如箭

揚州平生未得面二十四橋須一見 桂隱詩集

李孝光送醫師王宜往維揚醫疾如醫國乃貴知盧周
生死固有命慎此湯液投瞑眩不足驚坐令積疾瘳活

人樹陰德豈愛千金酬上天工報施令子高門優勿言
醫小技大者喻國謀爲術宜慎終眾藥亦預收吾言如
足念可比明月球 李五峯集

吳克恭客廣陵荅天錫見貽韻泛舟春風生江光颺雲
藻人生杜牧遊柳色淮南道幸欣韶芳媚孰云春事杪
遠思極絲絲無緣是芳草 寅夫集

陳方送王季野由鎮江過揚州省覲父尙書公楚楚斑
衣照暮春蒲帆帶雨出西津樹迷瓜步青如薺江漾蕪
城白似銀久謂尙書安寢少不勝天子寵榮新暫時定
省成懽懽枉使吹簫送客頻 孤篷倦客集

陳孚揚州作千載殘城生亂莎夕陽吹角雨風多吳公
臺下已黃土揚子橋頭空白波隔岸櫓聲桃葉渡滿船
燈影柳枝歌當年杜牧亦何意空向珠簾醉綺羅 觀先集

宋褰晚泊維揚驛二首驛檣紅樹晚蕭蕭解勸征人駐
畫橈儼辦青樓狂醉酒月明何處玉人簫 朱軒翠館
鬱岩巖幾度笙歌幾處橋怪得隔江人望見夜深燈火
似元宵 燕石集

王逢贈王履道還江都并序履道名貞乙未歲避地吳
下久之太尉張公開藩博采羣才遂以湖州德清學諭
辟之不受時予亦以承德郎行元帥府經歷辭及予隱

海上而履道已客授於此今年戊申始過其醉琴之所
且聞先隴獨免兵禍行治裝歸里葺墓廬有日於時贈
八句以見履道出處同而孝義非予所逮也斧越藩開
任俊良君辭儒校我辭郎青燈綠酒同今雨短褐窮櫛
度十霜鱸斫鱸魚初上水樓焚燕子不歸梁揚州月在
簫何處廬墓無殊衣錦光 梧溪集
錢惟善送慶雲壑西堂之揚州化緣白雲一壑包山臥
偶訪檀那作遠行天上賜衣披紫鳳雨中投寺聽華鯨
風濤此日長江險梁棟何年大廈成已誦法華踰萬遍
早回天竺話三生 江月松風集

蘇大年揚州長橋作綠陰高樹映清潭一舸夷猶酒半
酣最愛西城城下路長橋烟雨似江南 元詩選

王士熙送郭子昭淮東經歷夫君黃鵠姿氣排清雲上
嵯峨柏樹枝冰雪激清賞鋒錯太阿鮮韻叶立石響淮
海今勝區疆場記疇曩省俗出凋瘵主畫酬鞅掌南浦
春波深迢迢桂舟往論交心獨傾撫別意增惘古殿瓊
花開題詩寄遐想 江亭集

謝應芳瓊花行送盛克明教授歸維揚揚州好花非不
多奈爾絕品無雙何水沉香濃素玉蘂琉璃葉滑青瑤
柯東風二月花時節二十四橋香侵月小山叢桂避芳

塵東閣觀梅褪殘雪向來名士多品題括香御史今亦
知何日移春獻天子不負此花天下奇

龜巢集

卜思義過維揚露冷金槃酒價添雲埋瓊樹客愁兼竹
西舊曲無人理謾捲江樓一半簾

宜之集

陳秀民揚州詩瓊花觀裏花無比明月樓頭月有光華
省不時開飲宴有司排日送官場銀牀露冷停歌扇羅
薦風輕籠舞裳遮莫淮南供給裏逢人猶說好維揚

寄情

倪瓚李徵君將還揚州因言沈郎官吳中賦此以寄二
月桃始華淮南客還家階前疏雨落堂上春衣薄爲言

沈約在吳中玉壺青絲酒如空春風相過蕙草綠芳菲

滿堂樂未終

雲林集

張雨寄馮梅粟待制赴天目僧過廣陵三首天目峯頭

一鶴回白雲持贈當寒梅瓊花觀裏開包處寄得元砂

白紙來 三都一序爭傳賦借重西州黃士安慙媿山

圖經品藻苦心留得後人看 昨日淮南召八公揚州

擬看醉圍紅賺人雞犬雲中去策轉江頭控鶴童

貞居集

前人餞魯子升維揚憲幕頭銜新署似冰清蘭省超遷
分外榮代北衣冠傳舊族淮南草木借先聲大鵬徙海
扶搖上驄馬追風次第行久疾屬君深料理老懷此別

增仙書身集
卷二十一
若爲情

同上

馬臻舟次維揚數幅蒲帆作急流南風吹送到揚州封

侯拜將人何在日照荒城舊驛樓

霞外集

前人維揚春望東風吹盡馬頭塵空對今人憶古人不
見劉安雲裏過雨昏二十四橋春

同上

釋實存維揚春暮烟籠柳影老鶯蹄雨濕芹香乳燕飛
二十四橋春又盡江南詞客正思歸

白雲集

